

Joaõ

Deuxu Rybe Wihikỹ Tỹmyra, Joaõ Tyyritidỹỹdu

¹⁻² Ibutu aõna aõnakõu, Jesuisi rarehyymy raremyhỹ. Tii rybehyymy raninira. Tii Deuxu-wana ihỹre. Ihãre tahe tii Deuxule rare. ³Tii ibutuhukỹlemy riwinyre. Tiiõhyykeki tahe, aõ releõtyhy.

⁴ Umytuedeõna wahidỹỹdu tii ihỹre kia-di iny mahãdu rayky ritoosõnomyhỹre ritỹnynomyhỹre wahe. Kia loosõna heka bedede luru ludu loosõna rare. ⁵ Bedede luru tỹnyna loosõna rare. Loosõna ròtamyhỹre, bedede luru tahe ròanodỹỹmyhỹre.

⁶ Deuxu teòduõ diteõnyde, Joaõ inire. ⁷ Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenyremy. ⁸ Joaõ loosõna aõkõ rare. Urile tuu rarybekemy nade.

⁹ Jesuisile loosõnatyhy rare. Tii bedede-ò nadeu, ibutumy iny rayky ritoosõnyre. ¹⁰ Tii bedede-ki raremyhỹ, bedede widỹỹdu rare, ihãre tahe iny rieryõhyyre mobo tii ihỹre. ¹¹ Tasỹ mahãdu-ò dehemynyde, judeu mahãdu-ò wahe. Ihãre tahe ridyõhyyre, rityhynyõhyyre urile teramy reare. ¹² Iu inyõ Jesuisi rityhynomy ridyreu. Deuxu riõreõlemy risỹdỹỹnyre inimy rityhynyreki. Kia-ò tahe ruru tamy riwahinyre. ¹³ Kia ityhydỹỹdu tahe Deuxudeewilemy tule iriõreõmy roirekemy. Hãlubu-ribi aõkõ ratybienyre, urariribike

aõkõ, hãbudeewike aõkõ. Deuxudeewilemy iny ihỹmyhỹrenyre.

¹⁴ Rybe tahe umyõ rimyre, demy rexiijenyre, inyyreny-ki rasỹnymyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riõre delamy ratximyhỹre, sohojihyyre.

¹⁵ Joaõ Jesusimy rarybere kia wese: –Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe.

¹⁶ Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inyydeereny diwahinyde. ¹⁷ Deuxu bede ywina tahe Moisesi òraru-ki nade inyydeereny. Ruxetõenamy tahe inatyhyna Jesuisi Kristu òraru-ki nade. ¹⁸ Inyõ heka tiu Deuxumy robiõtyhy. Deuxuriõre delale heka itỹnydỹỹdu rare. Tuunatyhy-di taãxiõti-ki rimyre. Tiile iny-ò Deuxu ditỹnynyde.

¹⁹ Judeu mahãdu Jerusalẽ-ribi xiwena wahidỹỹdu mahãduõ diteõnyde Joaõ dỹỹraxidỹỹmy. Levita mahãduõ tule diteõnyde. Tahe roirenyre ritỹỹraxinykemy mobo tii raremy. ²⁰ Tahe Joaõ-ò rỹỹraxirenyre aõhereriwe mobo atxiteri. Joaõ dirawyõnyde inatyhymy rexitxiõnyrer: –Jiarỹ Kristu Deuxu deòdỹỹna aõkõ jiarỹ rare. ²¹ Tai tahe ixityre tamy rarybere: –Mobo tahe atxiteri, Elia aõbo. Aõkõre, Joaõ rarybere. Tahe Deuxu dee rybedu atxiteri inyboho riraõrenyleriõ wahe? Joaõ rarybere aõkõremy. ²² Tamy tahe ixityre raryberenyre: –Wakoreny bedelyyke mobo atxiterimy. Tai iny deòdỹỹdu mahãdu-ò

arelyyrenykre. Aõmybo iximy manarybeke?
²³ Tahe Joaõ rarybere: —Jiarỹ Isايا Deuxumy rybedu wesele adeereny ararybekre. Jiarỹ rybeterenaduõ jiarỹ rare. Jiarỹ bederahy-ki iny-ò rarywãhã.

Inynyrỹ-ò ryõ biòbitinyke.

²⁴ Fariseu mahãdu-ribi kia mahãdu roirenyre.

²⁵ Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri? ²⁶ Joaõ dirawyònyde: —Jiarỹ bedi iny reratysebenyteri. Inyõ tahe ayrenykile ratxireri. Tii tahe teeryõmahãtenyte. ²⁷ Tii wahewo-ribi kanakre. Jiarỹ raixỹrumy watxireri iwataana ese-ki, tii waratyrereki. ²⁸ Kia ibutumy aõhebo rotỹnyre Betỹnia hãwã bede-ki. Jordaõ bero kowa weribi ijã-ki ihỹre. Tai iule Joaõ iny riratysybenymyhỹre.

²⁹ Txubiòwau tahe Jesuisi Joaõ-ò kedehe-mynykemy nade. Tahe rarybere: —Beteheke, kowa Deuxu budoeni naderi. Tii òraru-ribi iny ritakremynade. ³⁰ Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemaã.

³¹ Reeryõre heka tii, ihãre tahe anade tii aritỹnykemy judeu mahãdu-ò. Tai tahe anade iny bedi reratysebenymahãremy.

³² Tahe Joaõ tamyreny relyyre: —Jiarỹ Deuxu Tyytybytyhymy rabire tamy dobehede-ò. Bòtòe wesemy ityre-ò desede. ³³ Deuxu riwateònyre bedi iny ariratysebenykemy. Tahe riwateònyreu tahe wadee rarybere: —Aõmy kai bobikre?

Deuxu Tyytybytyhy rononymy resekele inyõtyre-ò. Tii sohojile tahe Deuxu Tyytybytyhy-dí iny riratysebenykre. ³⁴ Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riõre raremy.

³⁵ Itxubiòwau tahe Joaõ taerydỹna inatxiõ-wana raremyhỹ. ³⁶ Tahe Jesuisi nadeò tuu robire. Tahe tamahãdu-ò rarybere: —Kowa tahe Deuxu Budoeni naderi. ³⁷ Kia rybe-ò tiiboho roholareu, tahe ròirenyre Jesuisi riheludunyrenykremy. ³⁸ Jesuisi tahe tuu robire ihemy roirerimy. Tahe tamyreny rarybere: —Aõbo teijetenyteri. Tahe dirawyònyde: —Rabi (kia rybe tahe irybereny-ki, erydỹdu rare), titxibo kai tasỹnymahãte. ³⁹ Jesuisi rirawyònyre: —Bòdòibedenyke betehebennykemy. Tahe tii-wana roirenyre, tamy reteherenyre. Tahe txioromy tii-wana ihỹmyhỹ. ⁴⁰ Joaõ rybe-ò ijohonaduõ, Jesuisi helududỹduõ, Andre rare. Tii Simaõ Pedro seriõre rare. ⁴¹ Andre tahe taseriõre Simaõ aõwesele rioryre. Tahe tamy rarybere: —Mesia-ki inyboho rahamy ratximyhỹrenyre. (Ka rybe, Mesia, heka. Kristumy rare, Deuxu deòdỹna rare.) ⁴² Tahe Andre Jesuisi-ò Simaõ didyde. Jesuisi Simaõ-ò retehere urihimyò idi tamy rarybere: —Kai Simaõ tate, Joaõ riõrere. Iribi tahe ani Sefamy rarekre (Kani heka Pedro rare.)

⁴³ Itxubiòwau Jesuisi Kalileia-ò rakremy ixi-di rõhõtinyre. Tahe Filipi riijere. Tamy rarybere: —Wahemy manakekõ aõbo. ⁴⁴ (Filipi tahe Besaida hãwã luduõ rare Pedro, Andre-wana ihãwãluduõle rare.) ⁴⁵ Filipi tahe Natanaeli witxi reare. Tamy rarybere: —Moisesi bede ywina

tyyriti-ki inyõmy rarybere: –Tule Deuxu dee rybedu tyyriti-ki rarybere. Taile rahare. Jesuisi ihÿre. Nazare hãwã luduõ rare. Jyje riõre rare. ⁴⁶ Tahe Natanaeli ritÿÿraxinyre: –Aõwihikÿ aõkãbo Nazare hãwã-ribi kadõhõnykre. Filipi rirawyõnyre: –Manake betehékemy. ⁴⁷ Jesuisi Natanaelimy robire naderimy tahe tuu rarybere: –Kowa judeu mahãduõ inatyhy rare. Tii hãbu õbiti rare. ⁴⁸ Tahe Natanaeli rarybere: –Timykibo tiwaeryteri. Jesuisi rirawyõnyre: –Figueira òra-ki tanyteò, umy rabire. Filipi aòrysomy raõreule, umy rabire. ⁴⁹ Natanaeli rimasajuamy rirawyõnyre: –Kai Deuxu Riõre tate Inerydÿÿdu tate. Kai judeu mahãdu Iòlò tate. ⁵⁰ Jiarÿ adee rarybera: –Figueiraòra-ki umy rabireki. Kiakile aõbo, tiwatyhynyteri. Iratyre aõna aõna wiwihikÿ adee ariteòsinykre. ⁵¹ Inatyhytyhymy adee araybekre: –Biuwetyy riranykre. Jiarÿ biuloosõna hãbu jiarÿ rare. ÿjuboho Deuxu-ribi wadee doideò kai bobikre. Idi waribi roireò bobikre.

2

¹ Inataõ txu-di tÿmyra herina txumy reare. Kana hãwã-ki Kalileia bedeki. Jesuisise tai ratximyhÿre. ² Jesuisi tule ritobinyre tamy rakremy taerydÿÿna mahãdu-wana. ³ Lisinaube tya-ki vÿi mona ituere. Tai Jesuisise Jesuisi-ò rarybere: –Vÿi mona ituere, imona kõre. ⁴ Jesuisi rarybere: –Nadi, aõhebo arotÿÿnykre. Aõka wawidÿÿkõna wabededÿÿnanamy aõkõka bedeki rÿireri. ⁵ Tahe Jesuisise deòdu mahãdu-ò rarybere: –Anowidÿÿkÿmy adekereny tiki rarybekeki, ibutumy biwinybenyke. ⁶ Debòsohoji reurò mana

butxi nihikỹ tai rỹimyhỹ judeu mahãdu ibe-di brebu òraru-ki aõna aõna risuhòmehỹre worana bedehesinau. Mana butxi sohoji sohoji 80 urihixina ratyre rimyre. ⁷ Jesuisi tamyreny rarybere: –Ibutumy bedi bitỹxinybenyke. Tahe ibutumy ijà ratyre ritỹxinyrenyre. ⁸ Katahe iribi bitake. Worana bedehesi wedu-ò biwybenyke imona. Tahe riwyrenyre. ⁹ Kia bee heka Jesuisi riwitxiranyre vỹi monamy. Tahe iwedu riurihire, rieryõre tiribibo nade. Deòdu tahe rieryre juhuu bee rare. Tahe iwedu rarybere weryrybò heridu-ò: ¹⁰ –Katahe awityhyre. Kai ijõ-ribi iwitxiratyhymy tewinyteri. Ijõ iny heka awityhy iko-ò ritxiwimyhỹ. Ihewomy tahe awiriõre ritxiwimyhỹre. Kai tahe awityhy ikonana-ò teyrubunyta. ¹¹ Katahe aõna aõna wiwihikỹ iny itxerenamy juhu ludu rare. Kana hãwã-ki Kalileia bedeki ihỹre. Tii tarurutere riteòsinymyhỹre taerydỹỹna mahãdu-ò. Tai ierydỹỹna mahãdu rityhynyre.

¹² Iribi tahe Kafanaõ hãwã-ò Jesuisi dobehede tadi, taseriõre, taerydỹỹna mahãdu tii-wana roirenyre. Ijõtxumy tahe tai bedetỹnyna rỹira.

¹³ Pascoa worana bedehesi iòhòmỹ rỹireu, Jerusalẽ rotuore kia tahe judeu mahãdu worana bedehesina rare. ¹⁴ Tai Jesuisi Deuxu dohodỹỹna hetowo-ò ralore. Tahe iwo-ki itxi reare sõwemy aõna aõna-di rohonyreriò, broreni-di ijohodu-txi, budoeni-di ijohodu-txi, bòtòe-di ijohodu-txi, tule nieru witxira witxira wibydyỹdu mahãdu-txi reare tai ronymyhỹki. ¹⁵ Jesuisi reroti awaru hãtena wesemy riwinyre. Idi tahe dohodỹỹna hetowo-ribi ibutumy riòlòdỹỹre, budoeni,

broreni-wana, tahe nieru wibydyỹdu mahãdu oworubesedyỹ-di Jesuisi rehure, tai nieru rejuxunyre. ¹⁶ Tahe rare bõtòe-di ijohodu-ò. Tamy rarybere: –Biòlòdyỹnyke wa. Waha heto dori aõ-di ijohona aõkõ rare. ¹⁷ Tahe Jesuisi erydyỹna mahãdu tõhõti-txi reare aõbo Deuxu Tyyriti-ki roiretxi:

–Waha heto yrubudyỹna-ki dori riwasamyhỹre. Ariyrubunyky dori watrixeri, tai riwasareri.

¹⁸ Judeu mahãdu Jesuisi-ò rỹraxyre: –Aõherekibo kai teòlòdyỹnyteri. Mobo he arateranyreri tuu biwinykemy. ¹⁹ Tahe Jesuisi rirawyònyre: –Deususỹ-di behuke tahe inataõ txu-di aditamadyỹnykre. ²⁰ Tahe judeu mahãdu rarybere: –Ka heto 46 beòra-di relere, timykibo kai inatãõ txu-di biwinykemy. ²¹ Jesuisi tahe Deususỹmy taumylemy rarybere. ²² Iribi tahe iu rubu-ribi iixixana-txi tõhõtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

²³ Jerusalẽ-ki Jesuisi Pascoa worana bedehesidyỹna riwyre. Aõna aõna wiwihikỹ inyy-ki ritxienyry riwinyre. Tai sõwemy iny inityhy rityhynyre. ²⁴ Jesuisi tahe urihimyòle iny rityhynyre. ²⁵ Tii dori ibutumy iny rayky rierymyhỹre. Inyõ timy iny raremy tiu tamy aõna relyyõtyhy tii ibutumy aõerydu rareki.

3

¹ Nikodema fariseu mahãduõ rare. Tii judeu mahãdu weduõ rare. ² Tii rudimy Jesuisi roramy rara. Tahe tamy rarybere: –Wanyrỹ, reeryrenyry

kai Deuxu-ribi erydỹdu tate. Inyõ Deuxu-diõkeki tii aõ wiihikỹ riwinyõtyhy. Iwese aõ wiihikỹ kai tewinyte wese. ³ Tahe Jesuisi rirawyõnyre: — Inatyhytyhymy adee ararybekre: — Inyõ ixityre reakõkeki, tiu Deuxu Òlõnasỹmy robiõtyhy.

⁴ Nikodema rỹraxyre: — Timykibo matuari ixityre reakemy. Timyrabo, ixyby tadiwo-ò iny ralõkeki aõbo ixyby iny raumynyke. ⁵ Tahe Jesuisi rirawyõnyre. Inatyhytyhymy rarybere. Inyõ bera-ribi ratybienyõkeki Deuxu Tyytybytyhy-ribi ratybienyõkeki, tiu ralõõtyhy Deuxu Òlõna-ò. ⁶ Deribi tybie heka dee rare. Deuxu Tyytybytyhy-ribi tybie tasỹ tyytyby rare. ⁷ Idi wanaõtaõmy aõmybo rarybereridi ixityre ijiranamy. ⁸ Tiò tiò yhy ribonymyhỹre: — Iwodỹỹ taholate, tahe tiribibo namyhỹde teeryõmahãte tiõhe ramyhỹre teeryõte, kia wesele iny Deuxu Tyytybytyhy-ribi tybie iny rỹire. ⁹ Tahe Nikodema rỹraxyre: — Timyrebohe kia ratxike. ¹⁰ Jesuisi dirawyõnyde: — Kai judeu bede erysydỹdu tate ihãrele teeryõte aõbo. ¹¹ Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyõte. ¹² Bede aõmydỹỹnanamy rarybere tahe tetyhynyõte. Timybo bityhynyke biu aõmydỹỹnanamy ararybekeki. ¹³ Iny sohojile biu-ò raòwõnyre, Deuxu Riõre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.) ¹⁴ Iwese Moisesi bederahy-ki womati hemylala ritamadỹỹnyre wese, Kiawesele jiarỹ, Deuxu Riõre Hãbutyhyhykỹ, wadi kidiwatamadỹỹnykre. ¹⁵ Tahe inyõ wadi rityhynykeki, umytuedeõna tuu ritamy

rỹihyy rakre.

¹⁶ Deuxu Riõre sohojihyyle rare. Deuxu bedede ludu mahãdu ibutumy iluutyhyre. Tai tahe tariõre diteõnyde iny rityhynykremy. Inyõ tii rityhynyre-wana, umytueõnahakỹ ritakre. Tii ruruõtyhy rubu bina bede-ò. ¹⁷ Deuxu taRiõre bede-ò diteõnyde bedede iny mahãdu tarasadumy rarekemy. Aõ iny ywisidỹna-ò rirutykemy aõkõ. ¹⁸ Inyõ rityhynymyhỹreki, tii ywisidỹdu idi rehuõtyhy. Iny rityhynyõmyhỹreki tiihe aõhõkỹmy dỹnana-txi riteõnykremy Deuxu idi ratximyhỹre, tii dori Jesuisi rityhynyõhyymyhỹre, Deuxu Riõre dela wahe. ¹⁹ Ibinatyhymy iny aõmydỹnana bedede bedemy rỹira, tai bedede luru-ki rira tamy awira. Tuu loosõna nadeu, tamy ibinare. Tai tahe Deuxu riteõnykemy idi ratximyhỹre. ²⁰ Inyõ aõbinahakỹ rotỹnymyhỹre, loosõna dera heka tuu rỹira; loosõna-ò rehemynyõtyhy, rehemynyre-wana, iny taaõbina bina rierymyhỹre. ²¹ Iny tahe awiwihikỹle rotỹnymyhỹre-wana tii tahe loosõna-ò rehemynykremy rỹira, taaõmydỹnana dori Deuxudeewimy ririmyhỹre, ibutu iny rierykremy ririre.

²² Iribi tahe Jesuisi taerydỹna mahãdu-wana Judeia bede-ò ròirenyre. Tai heka bededỹnanaõ riwyre. Tiibohe iny ityhydỹdu mahãduõ tai riratysebenyrenyrene. ²³ Joaõ iribi iõhõmy ratxireri. Iny riratysebenymyhỹre. Tii Eno hãwã-ki Salĩ hãwã-ribi iõhõmy roire. Tai riratysebenyrene sõwemy bee tai roimyhỹreki. Sõwemy iny tamy ratysebenymy rare. ²⁴ (Joaõ iu rotenamy ralõõlemy ratximyhỹ.) ²⁵ Judeu mahãduõ, Joaõ

erydỹyna mahãdu-wana rybetere txiõdỹyna ròhònryra, bede ywina òbiti aõmydỹynanamy wahe. ²⁶ Tahe Joaõ erydỹyna Joaõ-ò doidenyde rarybekremy: —Waerydỹydureny. Kai hãbumy telyymy tatemahã, kia Jordaõ kanawe-ribi ijà-ki umy-wana raremyhỹ, tii ròratysebenyreri. Sõwemy iny tamy wirotyre. ²⁷ Tahe Joaõ tamy rarybere: —Kia wadee awire aõ aõkõ iny ritamyhỹre, biu-ribi kanakékile tahe iny aõ ritake. ²⁸ Jiarỹ heka Jesuisi nonanamy ijyymy diwateònyde wahewo-ribi kanakremy. Jiarỹ tii aõkõ rare. Tii tahe Kristu tyhy rare. Jiarỹ kiamy juhuhu rarybewãhãre: —Kia tahe teerytenyte. ²⁹ Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiòwa weselemy jiarỹ rare. Tahe irybe-ò raholareu, reysamy rarewãhã. ³⁰ Tai wadee awire iny tii rieryreki, waribi tahe nohõti rosakemy idi watxiwãhãre.

³¹ Tii biujuxahakỹ-ribi nadeki ibutu ratyremy ratximyhỹre. Bede-ribi jiarỹ anadeki, tahe bede ludu jiarỹ rare, bede aõmydỹynanamy rarybewãhãre. ³² Tii rarybere aõmybo roholare, robire, tahe ijõ iny rityhynyõhyyre irybe. ³³ Inyõ tahe rityhynykeki, tii tule ijõ-ò rarybere, Deuxu inatyhy rare wahe. ³⁴ Deuxu deòdỹyna heka irybelemy rarybere Deuxu dori Tatytybytyhy ibutumy tamy diwahinyde. ³⁵ Tyby taRiòre luure, tai tahe ibutu aõmydỹynana ywisidỹymy tamy diwahinymy diteònyde. ³⁶ Iny Jesuisi rityhynymyhỹreki, umytuedeònahakỹ-di iny rỹira. Inyõ tamy ratxiõkeki, tiu umytuedeõna robiõtyhy, Deuxu ykarana dori tii-wana ratximyhỹre.

4

1-4 Inyõ fariseu mahãdu-ò rarybere: —Jesuisi Joaõ-ribi iny sõwemy diratysebenymyhỹde. Sõwemy iny ritamyhỹre ierydỹmy. Tahe Jesuisi aõkõ ròratysebedỹmyhỹre, ierydỹnale tahe riratysebenymyhỹre. Iu Jesuisi kiamy rieryreu tahe, Judeia-ribi rexitare. Roirenyre Kalileia bede-ò ritehemynkemy. Roirenyreu tahe Samaria bededihyyle riòhòrenyre. ⁵ Samaria bede hãwã-ò tahe ritehemynyre. Sika inire. Ijaò riòresu-ribi iòhòmy ròira, tariòre Jyje-ò riwahinyre wahe. Ijaò behãloo tai rỹimyhỹ. ⁶ Txutyeyu tahe Jesuisi elerihynymy ronymyhỹ tatilemy nadeki berysyna werora-ki. ⁷ Tahe Samaria mahãdu hãwyyõ dobehede beixemy. Jesuisi tamy rarybere: —Beõ inihe wadee bidiõke. ⁸ Jesuisi erydỹna mahãdu tahe juhuu roirenyre hãwã-ò rỹsỹna itxemy. Tai Jesuisi riraòmy ronymyhỹ. ⁹ Tahe hãwyy rarybere: —Kai judeu mahãdu tate, jikarỹ samaria mahãdu rare. Anoherekibo wadeke textòenyteri bemomomy. (Judeu mahãdu Samaria mahãdu-wana wimyy reaõhyymyhỹre. Widi òludu wesemy rare.) ¹⁰ Tahe Jesuisi rirawyònyre: —Kai heka teeryõhyteri mobo jiarỹ rare wahe. Tule, Deuxu wahisidỹna teeryõte. Tiwaeryteriwana kai bedexitòenyke, tahe bee irumy ihỹre adee ariwahinyke. ¹¹ Hãwyy rarybere: —Wahĩ, timybo bee irumy ihỹre wadeke kanakre. Kai ahynakõre, hãloko heka behekyre bee irehere. Timybo bee iru kumy-wana ratxireri. ¹² Kai anobohe inytyby Ijaò ratyrere. Tiki heka behãloko wedu juhuku rare; idi riwahinyre inydekereny. Iribile iritxiòre riõmyhỹre tiki-wana,

ibroreni riõmyhỹre. ¹³ Jesuisi tahe tarybetyhy-di rarybere: —Inyõ kahãloobemy riõkeki, ixityre bemomomy ruruke. ¹⁴ Jiarỹ bee ariwahinyke. Inyõ tahe kiabemy riõke-wana, tiu bemy tamy umytedeõnahakỹ riwahinyhyymyhỹre. ¹⁵ Tahe hãwyy rarybere: —Wahĩ bee tuedekõdu ikuny tuu kariõke. Tai kakò kanakõtyhy berysymy. ¹⁶ Tahe Jesuisi rarybere: —Maa hỹny, ahãbu biõryke, tahe manake. ¹⁷ Hãwyy dirawyõnyde: —Anokõre, wahãbukõre. Jesuisi rarybere: —Inatyhymy tarybeteri ahãbuõremy. ¹⁸ Kai heka iruyre ahãbu tate. Wijina tahe ahãbu aõkõ rare atỹhibiõwale wahe. Kia tahe inatyhymy tarybeteri. ¹⁹ Wahĩ, wiji tahe arakeryra, kai Deuxu rybeduõ tate. ²⁰ Wahareny Deuxumy realãmehỹre kahãwãlõ-ki. Amahãdu anokõ, tamy tahe Jerusalẽ Deuxu dealàna rare. ²¹ Tahe Jesuisi rarybere: —Lerỹ, warybe bityhynyke. Kanakre itxu kahãwãlõ-ki aõkõ, Jerusalẽ-ki aõkõ Waha Deuxu dealàna rarekre. ²² Kaiboho aõmybo tealàte teeryõtenyte. Jiarỹboho tahe aõmybo realàre, reeryrenyre, tarasana dori judeu mahãdu-ribi nade. ²³ Kia bededỹnanamy reara. Inyõ Waha Deuxu àlanamy ratximyhỹreki Deuxu Tyytybytyhy-di, inatyhyna-di realãmehỹke. Tuu dealàna mahãdu Deuxu riijemyhỹre. ²⁴ Deuxu Tyytyby rare: —Tai tahe tudealànadu tattytyby-ki inatyhyna-ki tuu realãmehỹre. ²⁵ Kia tahe jikarỹ rekeryre, Mesia kanakre, Deuxu dekòdỹkỹnamy wahe, Kristu inire. Tiki kanakreku wahe, ibutumy inydekereny anona anonamy relykykre. ²⁶ Jesuisi rarybere: —Jiarỹ tahe tiire, umy-wana wiji rarybereri wahe.

27 Tahe Jesuisi erydỹỹna mahãdu rehe-mynyre. Hãwyy-wana rarybereriki tahe ribedeòtiidỹỹnyrenyre. Tahe inyõ tamy rỹỹraxiõhyyre. Aõmybo tamy rỹỹraxire, ada aõherekibo tamy rarybereriki. 28 Iu tahe hãwyy tabutxi ririre, hãwã-ò rara. Tahe tahãwã mahãdu-ò rarybere: 29 –Bodoibedenyke wahemy. Betehebenykemy hãbu-kò. Tiki wakoku relykyre ibutumy anohebo ratỹkỹnymahãremy. Tiki kòsana Kristu ratxireri. Deuxu dekòdỹkỹna rare. 30 Hãwã-ribi roirenyre Jesuisi-ò. 31 Iu hãwyy hãwã-ki rareamyhỹreu, tahe ierydỹỹna Jesuisi-ò rarybere: –Iny erydỹỹdureny rỹsỹnaõ birỹsỹke. 32 Tahe Jesuisi rarybere: –Warỹsỹnadire wahe. Kaiboho heka kia rỹsỹna teeryõtenyte. 33 Tahe widee raryberenyre: –Inyõ kõaõboka tamy rỹsỹnaõ riwyreri. 34 Jesuisi rarybere: –Wadeòdỹỹdu deewimy ariwinykemy idi watxireri. Kia tahe warỹsỹnare, iaõmysỹdỹỹna arihukemy wahe. 35 Maixõmo butuna inaubiòwa ahãdu-di bidiòrarunyenkyremy kaiboho tahõtinytenyteri. Tahe aõkõre adeereny ararybekre. Betehebenyke bedero-ò. Maixõmo redenamy rỹire. 36 Kia maixõmo butudỹỹdu iòwy ritake, tahe umytuedeõnahakỹ-ò iny ributumy. Tahe wiwanale riwodeysanymyhỹre ibròdỹỹdu ibutudỹỹdu-wana. 37 Iwese inyõ rarybere wese, inatyhy rare. Ijõ tahe ibòròdỹỹdu rare. Iwixira tahe ibutudỹỹna rare. 38 Jiarỹ kaiboho arateònymahãre. Aõbo tebòrònyõtenyte tahe bibutumyke. Juhuu inyõ raaõmysỹdỹỹre: –Kaiboho tahe iraty temytenyte.

³⁹ Tahe hãwyy òraru-ki sõwemy Samaria hãwã mahãdu rityhynyre. Hãwyy rarybere juhUU: —Tiki wakoku relykyre ibutumy anohebo ratÿkÿnymahãre walananonanamy relykyre. Kia rybe òraru-ki tahe rityhynyrenyre. ⁴⁰ Samaria hãwã mahãdu tahe Jesuisi-ò rexitòenyre tii-wana roirekemy. Tahe Jesuisi tii-wana inatxi txumy riwyre. ⁴¹ Sõwemy tahe rityhynyre Jesuisi Rybe òraru-ki. ⁴² Tahe hãwyy-ò rarybere. Wiji tahe arybe òraru-ki aõkõ retyhynyneri. Tamy tyhy-ò jiarÿle raholare, tahe reeryre tii bede iny tarasadu tyhymy raremy.

⁴³ Inatxitxu-di tahe Samaria-ribi rare Kalileia bede-ò. ⁴⁴ Jesuisile dori rarybere: — Deuxu rybeduõ uladumy ijirana bede-ki iny rityhynyõhyymyhÿ. Tiu tamy wowydynaõ riwahinyõtyhy. ⁴⁵ Kalileia mahãdu juhUU Jerusalẽ-ò tule roirenyre, worana bedehesi rÿimyhÿrað. Ibutumy aõbo Jesuisi riwinyra heka tiiboho reteherenyre. Tai Jesuisi tasubede-ò rehemynyre tiiboho awimy ridyrenyre.

⁴⁶ Tahe ixityre Jesuisi rehemynyre Kana hãwã-ò. JuhUU tai bee riwitxiranyre vÿi monamy wahe. Bede dinodu aõmysÿdÿÿdu Kafanaõ-ki rasÿnyre. ⁴⁷ Jesuisi Kana hãwã-ki ratxirerimy hãbu roholareu, tamy rara. Tariòre dori ibinamy roire taheto-ki. Jesuisi-ò hãbu rarybere: —Manakekõ aõbo waheto-ò wariòre biteytekemy. ⁴⁸ Jesuisi rirawyònyre: —Kaiboho bede aõmydÿÿnana wiwihikÿ tetehetenyteule tetyhynytenyte. ⁴⁹ Hãbu heka Jesuisi-ò rarybere: —Wanyrÿ, wylemy manake wariòre rurukreko-txi. ⁵⁰ Jesuisi rarybere: —

Bòðseke, ariòre dori awimy relera. ⁵¹ Tahe tii Jesuisi rybe rityhynyra tai ròðsere taheto-ò rakemy. Ijõ txu tahe ryro-ki teòdu-wana witxi reare. Tii rarybere: —Ariòre reytera aheto-kile. ⁵² Hãbu ritỹraxyre tiubo reytera. Tahe relyyre. Kaule, txutyeyu reytera. ⁵³ Jesuisi rarybereu, kiaule iriòre reytera. Hãbu rieryre. Tai tahe idi ibutumy hãbu sỹmahãdu Jesuisi rityhynyre. ⁵⁴ Kia tahe Jesuisi inatxina aõna aõna wiwihikỹ iny itxeranyu riwinyre Kalileia bedeki.

5

¹ Iribi tahe judeu mahãdu worana bedehesimy rỹimyhỹ. Tai tahe Jesuisi rare Jerusalẽ-ò. ² Hãwã-ki tahe hãloo ibedỹỹ roimyhỹ budoeni ryijò iòhò-ki rỹimyhỹ. Beteta inire, hebraika rybe ini rare, judeu rybe wahe. Iruyre iwòtena ube iwerora-ki rỹire. ³ Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre. ⁴ Tiiboho ÿjuõ riraòmyhỹre. Ýju beò rerireu tahe raukỹre. Mobo juhu itxi resekeki tahe, tii reytemyhỹre. ⁵ Hãbuõ 38 beòramy ibinamy roimy raremyhỹ. ⁶ Jesuisi tamy retehereu, rieryre tiwesebeòrabo ibinamy roimy rare myhỹ. Tahe tamy rarybere: —Kai aõbohe beytekekõ. ⁷ Hãbu dirawyònyde: —Aõkõre Wanyrỹ, wawìhedỹỹduõre. Bee rexiukỹnyrau, ijõ wako-ò ralòmyhỹre. ⁸ Jesuisi tamy rarybere: —Myikewa, abyre bimyke, mariake. ⁹ Aõwesele hãbu rỹimy reare, awimy. Tabyre rimyre tahe rariare. Kia txu tahe sabado txu rare. Kia txu tahe judeu aõmysỹdỹỹna txu aõkõ rare. ¹⁰ Tai tahe judeu mahãduõ tamy rarybere:

—Abyre-di riraõmy, sabado txu dori òbiti aõkõ rareki. ¹¹ Tahe dirawyònyde: —Wadeyedỹdu wadee rarybere wabyre arimykeny. ¹² Tahe tamy rỹraxyre: —Mobo adee rarybere abyre bimykeny idi mariakemy. ¹³ Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rỹimyhỹ. ¹⁴ Deuxu dohodỹna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aòraruna biixãwidinyke, aõbinatyhy aõhe adee rotỹnyheny. ¹⁵ Hãbu tahe rare. Judeu mahãdu-ò rarybere, mobo teytedỹdu raremy, Jesuisi wahe. ¹⁶ Tai tahe judeu mahãdu Jesuisi ibinamy rexideleny rarybere, sabado txuu kia riwinyreki. ¹⁷ Jesuisi tahe rarybere tamyreny: —Waha, Deuxu aõu raaõmysỹdỹre, jiarỹ tulere. ¹⁸ Tai tahe sõwemy irubudỹmy ruryhyre. Sabado txu bede ywina-ribi tii riwinyõre. Tule Jesuisi Deuxu wesemy rexioire, Wahamy dori rarybemyhỹreki.

¹⁹ Tai tahe Jesuisi tamyreny rarybere: —Jiarỹ ixi-di aõkõ aõmydỹnanamy ratỹnymahãre aõbo Waha riwinymyhỹre, jiarỹ tule rewinywãhãre iweselemy. ²⁰ Waha Deuxu dori waluure. Aõbo riwinyre wadee riteòsinyre, tai tahe aõruxerahakỹtyhymybo bobibenykre, idi bede biòtiinybenykre. ²¹ Waha Deuxu dori rubu-ribi iny riixixanyhyre. Tai tule jiarỹ iny areixixanyke ixideewikeki. ²²⁻²³ Ibutumy iny hitxidỹna Waha wadee tuu rarybera, tii dori iny rihitxidỹnyõtyhy. Jiarỹle tahe iny ywisidỹdumy aròhònykre, tai iwese Deuxu iny riwowydynymyhỹre wesele iny riwawowydynymyhỹkre. Adeereny Deuxu

diwateònyde. Tai inyõ riwawowydynyõkeki, tii Deuxu riwowydynyõreri. ²⁴ Inatyhytyhymy adeereny ararybekre. Inyõ warybe roholakeki, wateòdỹydu rityhynykeki, tii wijityhyle umytuedeõna ritake, ywisidỹyduko-ò ròhònyõtyhy, rubu ryribi ròhònyre umy irumy ihỹre ryò iny ralòmyhỹre. ²⁵ Inatyhytyhymy adee arelyykre: —Bedeỹyana-ki kòhòra, bede dỹyanamy reara. Tahe rubu mahãdu Deuxu Riòre rybe-ò roholakre. Roholamy rỹikeu tahe irumy rỹike. ²⁶ Tyby dori iumyõnanaõhyre wese tule iRiòre rare. Umytuedeõna wedu rare. ²⁷ IRiòre heka hitxidỹyana wedumy relere. Tii dori Deuxu Riòre Hãbutyhyhykỹ tii rare, jiarỹ wahe. ²⁸ Bedeòtiidỹyõmy tahe bededỹyanamy he reare. Rubu mahãdu wabedey-ki warybe-ò roholakre, tai iribi ròhònykre. ²⁹ Ibutumy aõwibo riwinyre mahãdu kedexixakre umytuedeõnahakỹ-di. Kia ibinamy riwinymyhỹre mahãdu ywisidỹydu-ò rexixakre.

³⁰ Jiarỹ ixi-di aõkõ aõmydỹyanamy ratỹnywãhãre. Iwese Waha-ò raholare wese iny ywisidỹyõmy aròhònykre. Waywisidỹyana heka òbiti rare. Wadee wimy aõkõ dori tuu watxiwãhãre. Waha wadeòdudeewimy tuu watxiwãhãre. ³¹ Iximy ararybekre, inyõ riwatyhynyõtyhy. ³² Iwixira heka tuu rarybereri wamy wahe. Reeryre inatyhy raremy. ³³ Kaiboho inywixira teteònytenyte. Joaõ ratysebedỹydu-ò rỹyaxikemy ibutumy kia wamy rarybere inatyhy rare jiarỹ inatyhy rare. ³⁴ Iny wamy rarybemyhỹre, tahe jiarỹle kia reijeõhymahãre inyle rieryõre wamy rybe,

wahe. Tahe kiamy adee relyywāhāre kaiboho ritamy r̄yikemy. ³⁵ Joaõ tahe loosõna wesemy raremyh̄y. Tii urihimyò beded̄ȳnana ritoosõnymy raremyh̄y wesemy tahe kaiboho atximahātenyte. Idi urihimy-ò teysatenyte iloosõna-di, idi iribi kaiboho terarenyre. ³⁶ Jiar̄y Waha òraru-ki aõmyd̄ȳnana wiwihik̄y, rewinyamahāre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeòdu raremy riteòsinyre. ³⁷ Waha wadeòdu wamy tule relyyre. Kaiboho irybe-ò taholaõtenyte tule tii tabiõtenyta. ³⁸ Kaiboho tamy taholaõhymahātenyte, tiwatyhynyõteki, jiar̄y dori iteòd̄ȳna rare. ³⁹ Tyyriti-ò tetehtenyte iwo-ki dori umytuedeõna-ki mahakemy tahõtinytenyte. Ritid̄ȳnakile wamy relyymyh̄yre. ⁴⁰ Ihārele tahe wadee taõmahāte adeeremy umytuedeõna ariwahinykemy. ⁴¹⁻⁴² Aõmybo wamy iny rarybemahākeki, aõ aõkõ rare wadee, jiar̄y dori reeryre Deuxu luuna-di aõkõ atxitenyteri. ⁴³ Jiar̄y Wahani-di anade, tahe kaiboho tiwatyhynyõmy wadi ahāte. Inyõ ixideewilemy kanakeki, kaiboho bityhynybenykre. ⁴⁴ Tai heka tetyhynyõmahātenyte. Widee dori kaiboho tewowydynymahātenyte, tahe Deuxu-ribi wowydyna ritakemy terarenyre, sohojihyyre heka Deuxu. ⁴⁵ Kiamy tahe Waha-ò arelyyõkre, Moisesi tahe relyykre. Moisesi bede ywina dori, araròsõnyreny rare. ⁴⁶ Inatyhymy Moisesi tetyhynymahāte-wana tule jiar̄y biwatyhynymahāke, wamy dori Moisesi ròratid̄ȳre. ⁴⁷ Irybe bityhynyõkeki, timybo warybe

bityhynyke.

6

¹ Iribi tahe Jesuisi Kalileia aho-ki ixyby reurore, Teberiaade ahoniöre. ² Tahe sōwemy iny riheludunyre tuu robireki, aōna aōna wiwihikỹ, deytedyỹna wiwihikỹ robireki. ³ Tahe hãwãlòratyy-ò Jesuisi raòwònyre taerydỹna mahãdu-wana –rorukurenyre tai. ⁴ Judeu mahãdu worana bedehesi rexidelenykemy iòhøre. ⁵⁻⁶ Tahe Jesuisi retehere inysōwehekỹ-ò, tamy rehemynyre. Tai Filipi-ò riurihimy rarybere: –Tikibo orotxu tamyreny rikiòbranyke riyrenykemy. Jesuisi rierymyhỹre aōbo riwinykremy ratxireri ihãrele tahe Filipi-ò kia rarybere. ⁷ Filipi tahe dirawyònyde: –Inyō sohoji sohoji orotxu yre sohoji riykeki, 200 prata womati nieru rakahurenyke ihãre rimyōtyhy. ⁸ Andre Jesuisi erydỹna-ò rare, Simaō Pedro seriöre rare. Tii tahe Jesuisi-ò rarybere: ⁹ – Weryryboō kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aō aōkō rare inysōwe-ò. ¹⁰ Tahe Jesuisi taerydỹna-ò rarybere: –Tamy marybebenyke ranyrenykemy asityrekile. Tahe rorukurenyre ibutumy. Hãbu 5000 ronyre ijō inyō tahe sōwetyhymy rorukure. ¹¹ Jesuisi orotxu rimyre. Deuxumy reàlære, idi tahe tamyreny riwahinyre. Tule utura-wana wiwesele risỹnmy. Tuu rotỹnyre. Ibutumy heka ixideewina rirỹsỹreny. ¹² Rihydyrenyreu, Jesuisi rarybere taerydỹna mahãdu-ò: – Bibutumybenyke rauhenyra uritere ixinamy itxiwixirenyōkemy idi watxireri. Uritere idi

dehurenyõmy. ¹³ Tahe ributunyrenyire iuhe waòinatxi reuròmý weriri ritỹxinyre orotxu yrere-di. ¹⁴ Jesuisi aõwiihikỹ widỹỹnamy robirenyreu kiamy tahe raryberenyre. Tii inatyhymy Deuxu Rybedutyhy rare. Juhuu dori tuu rarybere kabede-ò kanakemy. Inyboho tii riraòmýhỹre.

¹⁵ Rõhõtynyrenyire: –Jesuisi inyiòlòrenymy rikimyrenykre. Tamy ròkòirenykre. Iu Jesuisi kia rieryreu, ixisohojilemy rexitare icyby, hãwãlò-ò.

¹⁶⁻¹⁷ Ibedesou aho ijà-ò ierydỹỹna mahãdu riberenyire riraòkemy. Bede rurunyire tahe Jesuisi rehemynyõhyyre. Tai hãwòõ rimyrenyire idi reuròkemy ijõwe-ribi ijà-ò, Kafanaõ hãwã-ò. ¹⁸ Tahe yhy deborehekỹ tiribi tiribi rebonymyhỹ. Òbò tahe resemýhỹ. ¹⁹ Sohoji urihixina iòhòmý ròireny tahe Jesuisimy robirenyre. Tii betyredile tamyreny nariamy nade. Tiibohe ruberunihikỹrenyire. ²⁰ Jesuisi tamyreny rarybere: –Jiarỹle wa rare, breburenyõmyke. ²¹ Tai tahe hãworo-ò Jesuisi ronykemy tiibohe disỹnydenyde. Aõ wesele tahe rehemynyrenyire tiòbo ròirenyraò.

²² Itxubiòwamy sõwemy iny wii ributunyire aho kanawe-ribi ijà-ki. Hãwò sohojile tahe tai roire aho-ki. Jesuisi erydỹỹna mahãdu roirenyremy rieryrenyire. Tahe Jesuisi aõkõ idi rare. ²³ Tahe hãwòõ dehemynydenyde. Teberiaade hãwã-ribi Jesuisi tai ratximyhỹ iòhò-ò. Tai juhu Jesuisi rexitòrenymy rỹimyhỹ tahe orotxu tamy riwahinyre. ²⁴ Jesuisi iõre tai, ierydỹỹna mahãdu iõre. Kia tahe iny sõwemy robirau, hãwò-ò rimyrenyire. Iòrysimy

roirenyre, Kafanaõ-ò. ²⁵ Kanawe-ribi ijà-ò rehemynyreu, tii-wana witxi reare. Tahe tamy rỹraxire. Waerydỹdureny, tiubo kaò tadehemynyte. ²⁶ Aõwiihikỹ rewinyremy aõkõ tiwaijetenyteri, rỹsỹna adeeremy rewahinyrakile, tehydymy terỹsỹtenytakile. ²⁷ Rỹsỹna tyhy ituemyhỹre kiaòle aõkõ maaõmysỹdỹỹbenyke, tahe iwixira rỹsỹnaõ-ò maaõmysỹdỹỹbenyke, kia ituedeõna-di aõkõ rare. Deuxu Riõre Habutyhyhykỹ dori adee riwahinykre. Kia rỹsỹna umytuedeõnahakỹ wesemy rare. Taile tahe Deuxu Waha riwateònyreri. ²⁸ Tahe Jesuisi-ò rỹraxire: –Timybo iny Deuxudeewimy arotỹnyrenykemy. ²⁹ Jesuisi dirawyònyde: –Kialemy, biwatyhybenyke: –Deuxu dori wateòdỹdumy rare. ³⁰ Tahe raryberenyre tamy: –Aõwiihikỹbo inyko-ò biitxeredỹỹnyke. Aõhebo botỹỹnykre, iny aratyhynykremy. ³¹ Inytybyreny orotxu riyrenyre bederahy-ki. Kia wese Tyyriti-ki roire:

–Moisesi tamy orotxu riwahinyre biu-ribi.

³² Jesuisi rirawyònyre: –Inatyhy tyhymy Moisesi aõkõ tamy riwahinyre. Waha dori biu-ribi orotxu tyhy adee riwahinyre. ³³ Deuxu orotxu tahe irutyhymy inydee riwahinymyhỹre, biu-ribi diwahinymyhỹde. ³⁴ Tahe raryberenyre: –Wanyrỹ, tiu kia orotxu bidiwahinymahãkre. ³⁵ Jesuisi iximy rarybere: –Jiarỹ orotxu irutyhymy rare. Inyõ wadee kanakeki, tiu rama risaõtyhy. Inyõ riwatyhynykeki, tiu bee risaõtyhy. ³⁶ Adeeremy heka rarybere: –Wamy tabitenyte, ihãrele tiwatyhynyõtenyte. ³⁷ Ibutumy iny Waha wadee riwahinymyhỹre wadee

kanakre. Tiu ixi-ribi ariteònyõtýhy. ³⁸ Adobehede dori aõ ixideewimy aõma arotýñnykemy aõkõ. Wadeòdýñdudeewimy arotýñnykemy watxiwãhãre. ³⁹ Tiu ariõnonyõtýhy wadee diwahinydeò kiaboho ibutумы ikonana txuu rubu-ribi ariixixanykre. Kia tahe wadeòdýñdu deewimy rare. ⁴⁰ Inatyhymy Waha deewimy kia rare. Iny iRiòremy robireu, rityhynykeu, umy tuedeõna ritake. Ikonana txuu tahe rubu-ribi ariixixanykre.

⁴¹ Jesuisi rarybere: —Jiarý biu ludu orotxu rare. Tai tahe judeu mahãdu aõbina binahakýlemy rarybemyhýre. ⁴² Kia wese rarybemyhýre: —Kaa Jesusile rare. Jyje riòre rare. Tyby he ijoi eryna rare ise tule. Aõherekibo tii rarybereri biu-rubu nademy. ⁴³ Tahe Jesuisi dirawyònyde: —Tuu wamy ryberenyõmyke ayludurenymy. ⁴⁴ Wadeòdýñdu iny wadee rayky-ò rarybemyhýre namyhýde. Kia wesele iny wadee kedehemynykre, ikonana txuu tiiboho rubu-ribi ariixixanykre. ⁴⁵ Deuxu rybedu Tyyriti-ki kia rybe rýire:

—Deuxu ibutумы iny ribedeerydýñnykre.

Tai tahe Waha-ribi iny rierymy roholamyhýre, tii tahe wadee rehemynykre. ⁴⁶ Inyõ Wahamy robiõhyymyhýre jiarýle tahe tuu rabimahãre, iribi anadeki. ⁴⁷ Inatyhytyhymy adee rarybemahãre. Inyõ riwatyhynykeki, umy tuedeõnahaký tiiwanale ratxireri. ⁴⁸ Jiarý orotxu wesemy jiarý rare. Umytuedeõna wahidýñdu jiarý rare. ⁴⁹ Boreny dori biu-ribi orotxu riyre bederahy-ki. Irabihyy ibutумы tiiboho ituerenyre. ⁵⁰⁻⁵¹ Jiarý tahe biu ludu orotxu wese rare, inyõ tahe kia orotxu riykeki, tiu ruruõtýhy. Waumy

ariwahinykre rubu-ò ibutumy iny òraruna òwydỹmy. Tamyreny umytuedeõna riwahinykre rubu-ò ibutumy iny òraruna òwydỹmy. Tamyreny umytuedeõna riwahinykre.

⁵² Judeu mahãdu tahe txiõdỹna rybemy widee raryberenyre: –Timybo tadelemy inyboho riòwenyrenkemy wahe. ⁵³ Jesuisi rirawyònyre: –Inatyhytyhymy adee ararybekre. Kaiboho Deuxu Riõre Hãbutyhyhykyde biròõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri.

⁵⁴ Inyõ waderòdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre. ⁵⁵ Wade heka juhu irònatyhy rare, wahãlubu tu monatyhy rare.

⁵⁶ Inyõ wade rirokeki, wahãlubu riõkeki, wawana tiuhyy ratxireri. Jiarỹ tule tii-wana watxihyyreri.

⁵⁷ Waha irumy ratxireri. Tii wadeòdỹdu rare iòraru-ki warumy watxireri. Tule waderòdu irumy ratxike waòraru-ki. ⁵⁸ Jiarỹ biu ludu orotxu inatyhy jiarỹ rare. Iwese bederahy orotxu heka boreny riyrewesemy aõkõ jiarỹ rare. Ihãrele tahe ituerenyre. Inyõ riwaykeki, rexisahyymy rarekre. ⁵⁹ Kia ibutumy Jesuisi rarybere Kafanaõ judeu dohodỹna-ki, rierynanymyhỹreu.

⁶⁰ Iribi tahe Jesuisi-ò ijohona mahãdu rarybere: –Kia isira tyhyre iny rieryke. Inyõ heka kia rityhynyõtyhy.

⁶¹ Jesuisile heka rexierymyhỹre tiiboho tuu rarybemyhỹreki, tahe tamy rỹrãxire:

–Kaa aõbohe arabinadỹnyrenyke.

⁶² Tahe jiarỹ Deuxu Riõre Hãbutyhyhykỹ, ixyby biu-ò aròõsekeki, timybo marybebenyke, kaiboho wamy bobibenykeki. ⁶³ Deuxu

Tyytybytyhyle umytuedeõna riwahinymyhỹre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare.

⁶⁴ Tahe inyõ ayreny ludu riwatyhynyõreri. Jesuisi tahe juhoo-ribi rierymyhỹre mobo rityhynyõmyhỹre, tule mobo tatxiõdỹỹdumy rarekremy. ⁶⁵ Jesuisi raryberehymy tii-wana: —Jiarỹ juhoo rarybewãhãre. Inyõ Waha wadee riteõnyõkeki tiu wadee kanaõtyhy. Tai heka tuu adee jiarỹ rarybere.

⁶⁶ Kia rybe õraru-ki sõwemy taerydỹỹna mahãdu ririrenyre. Tahe roirenyre. ⁶⁷ Tahe Jesuisi rỹỹraxire taerydỹỹna waõinatxi reurò mahãdu-ò. Ka bexe boibenyõkre aõbo biwaribenyõkre aõbohe.

⁶⁸ Tahe Simaõ Pedro rirawyõnyre. Wanyrỹ moobo arõirenykre. Kaile heka umytuedeõna rybe-di atxiteri. ⁶⁹ Jiarỹboho ka aratyhynymahãreny.

Araeryreny ka, kai Deuxu-ribi hãbu õbitityhymy atximahãte. ⁷⁰ Jiarỹ aratareny waõinatxi reurò inymy erydỹỹna mahãdumy. Ihãre tahe inyõ ratx-
imyhỹre diaboõ heka tii rare. ⁷¹ Jesuisi tahe Ju-

dasi Isariõmy rarybereri. Iwò inatxinamy wahe. Simaõ-Isariõ riõre tii rare. Judasi dori Jesuisi riwahinykremy ratxireri iõludu mahãdu-ò.

7

¹ Judeu mahãdu Jesuisi rubudỹỹmy rurumyhỹre. Tai tahe Judeia bedede ludu hãwã-ò ralõõmyhỹre. Kalileia bedede hãwãdile rariamyhỹre. ² Tahe judeu

mahãdu worana bedehesi iòhòmy r̃ĩmyhỹ. Kiani tahe heto riòre worana bedehesi rare. ³ Tahe Jesuisi seriòreboho tamy rarybere: –Make wa karibi Judeia mahãdu bede-ò aerydỹna mahãdu dori aõwiihikỹ kai tewinyteò tuu robikemy. ⁴ Aõwiihikỹmy tewinyteri, tai tahe ixinamy iny tuu ibutumy robikre. Ibutumy iny ixierysymy tahõtinyteri-wana urile iny lau iwòteõmy aõna aõna wiwiihikỹ. ⁵ Jesuisi seriòre mahãdu tule rityhynyõre. ⁶ Jesuisi tahe dirawyònyde: –Wiji araõkre wabededỹnanamy dori tuu reaõmy ratxireri. Kaiboho tahe adohotalemy bòike. ⁷ Bede ludu mahãdu iny dori aluurenyre, tahe waderamy rekoarenyre. Iòrarunamy dori jiarỹ tamy rarybemahãre, ibinatyhyremy. ⁸ Kaiboho boibenyke worana bedehesi-ò. Jiarỹ tahe wiji araõkre, wabededỹnanamy reaõmy doimyhỹde. ⁹ Kia tahe Jesuisi tamyreny rarybere. Tahe Kalileia-ribi Jesuisi ròhònyõmy r̃ĩmyhỹre.

¹⁰ Tahe iseriòre roirenyre worana bedehesi-ò. Idi tahe tule tii rare iherenymy itỹnymy aõkõ wahe, wasimy inyõ tuu robiheny. ¹¹ Judeu mahãdu tahe Jesuisi riijemyhỹre worana bedehesi òrake-ò. Rarybemyhỹre: –Tixibo tahe tii ratximyhỹre. ¹² Jesusimy rybe ixitxiòdỹna ròhònyre inysòwehekỹy-ki. Inyõ heka awimy tuu rarybemyhỹre. Ijõ tahe ibinamy tuu rarybemyhỹre, tii iny itxenadỹydu raremy. ¹³ Inyõ tuu rarybeõhyymyhỹre ibutumy ijohonamy judeu mahãdu lau ruberureki.

¹⁴ Worana bedehesi tya-ki Jesuisi Deuxu dohodỹna heto-ò ralore ribedeerynykemy.

¹⁵ Ribedeerynyreu tahe judeu mahãduõ

ijõ-ò rarybere: –Timykibo he kia ritidyỹna rierymy tuu rarybemyhỹre. Rierykõ ihãrele iny rierynanymyhỹre. ¹⁶ Tahe Jesuisi dirawyònyde: Waerydyỹna-di aõkõ rebedeeryre, Deuxu wateòdyỹdu rybe-di wahe. ¹⁷ Inyõ Deuxudeewimy ratxikeki, tii rierykre aõerydyỹnabo òbitimy ratxireri. Tii rieryke Deuxu-ribi aõbo rarybereri ada ixi-ribi rarybereri. ¹⁸ Iny ixi-ribi rarybekeki, tiile rexiloosònanyke. Tahe iny iteòdyỹdumy rarybekeki, tii tahe inatyhy rare. Tii inatyhymy òbiti rare. ¹⁹ Moisesi adee bede ywina riwahinyre: –Tahe kaibohoõ tetyhynyõhyymahãtenyete. Tai tahe aõherekibo biwarubunykemy atxitenyteri. ²⁰ Tamy inyõ dirawyònyde. Kaita itxýteteri. Inyõ ka ararubunykemy aõkõ ratxireri. ²¹ Jiarỹ inyõ reteytenyre sabado txuu tahe kaiboho wadi bede teòtiinytenyete. ²² Boholake, Moisesi bede ywina arateònyke ariòre ritòtyky aròkemy resynanykemy. (Boboho tahe kia tuu ritelenyre Moisesi aõkõ.) Tahe notyky resyna txu rỹikeki, tuu tewinyete sabado txu hãrele. ²³ Kia sabado txu biwinybenykeki Moisesi bede ywina riywinykemy, tahe aõherekibo wadee taykarananyteri hãbu sabado txu reteytenyeki. ²⁴ Aõ òbitimy aõkõ rare, òbitimy tahõtinyterikile. Òbitinale-di maraykynybenyke.

²⁵ Ijõ Jerusalẽ hãwã ludu mahãduõ rarybere:
²⁶ –Kia rarybemy rỹirerile, tii irubudyỹmy rexinohõtinyreri. Beteheke. Butumy ijohonanamy kia rarybemyhỹre. Ihãrele taheka inyõ tamy rarybeõhyymyhỹre. Wedu mahãdu rõhõtinymyhỹre: –Ina aõkàbo Kristumy inatyhymy tii rare.

27 Inyboho tahe rierymyhÿre titxiribibo tiò namyhÿde. Kristu Deuxu deòdÿÿna tahe kanakeu, inyõ tahe rieryõtyhy titxiribibo kanake. 28 Jesuisi tahe Deuxu dohodÿÿna heto-ki ribideerynymyhÿreu rarybere: –Kaiboho tiwaerytenyte, titxiribibo anade tule teerytenyte. Tahe wateòdÿÿdu teeryõtenyte. Teròwomy heka jiarÿ anade. Tule tii inatyhytyhymy rare. 29 Iribi jiarÿ anade Tii riwateònyre, tai jiarÿ tii reeryre. 30 Inyõ rijemyhÿ riròtenykemy. Tahe rimyõhyyre ruberureki, ibededÿÿnanamy aõkõ bede rÿireki. 31 Iny sòwehekÿ-ribi sòwemy iny rityhynyre. Tahe inyõ rarybere: –Kristu Deuxu deòdÿÿna iratyre aõna aõna wiwihikÿ riwinykemy tahòtinyteri. Aõkõre, tii dori inatyhymy Kristu rare. 32 Fariseu mahãdu kia-ò roholareu, tahe wii ributunyre xiwe wahidÿÿdu wedu mahãdu-wana. Tahe tiibohe soldadu mahãduõ riteònyrenyre Jesuisi rimykyre. 33 Jesuisi tahe tamyreny rarybere: –Urihimyò umyreny-wana watzikre, idi ta aròðekre wateòdÿÿdu-ò ixby. 34 Kiaboho biwaijebenykre, waki mahabenyõtyhy. Titxibo watzireri kia-ò heka bitehemynyõtyhy. 35 Judeu mahãdu tahe widee rarybere: –Titxiwexe tii rakremy ihÿre, tuu rokobirenyõtyhy tai rakaharenyõtyhy, myÿ rarybemyhÿre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykemy, judeu mahãdu-wana rasÿnykremy. 36 Timybohe rarybere: –Waki mahabenyõtyhy, titxibo watzireri-ò behemyhyõtyhy, myÿ rarybereri.

37 Ihewotxu worana bedehesi aõnihikÿtyhy rare.

Jesuisi iu rexiukỹnyre rarybekemy: –Inyõ be-momy risakeki, wadee kanake, riõke. ³⁸ Inyõ ri-watyhynykeki, Tyyritina-ki kia wese rybe rỹire:

–Iwo-ribi benihikỹ iru ròhònyke.

³⁹ Iu Jesuisi kia rarybereu, Deuxu Tyytybytyhy aõmy dỹñnanamy rarybere. Iny dori rityhynykeki, iwo-ò Deuxu Tyytybytyhy ralòke. Urile tahe Deuxu Tyytybytyhy riwahinyõmy rỹire. Jesuisi dori ròðseõre biu-ò. ⁴⁰ Tahe roholare mahãdu tahe rarybere: –Ka heka hãbu Deuxu Rybedutyhy rare. ⁴¹ Ijõ tahe rarybere: –Tii Kristu rare. Ijõ tahe rarybere: –Kristu aõkõ Kalileia bede-ribi dori tii rareri. ⁴² Tyyritina rybe-ki roire: –Kristu, Davi sỹ-mahãdu ribi kanakremy. Belẽ hãwã-ribi; titx-ibo Davi rasỹnyre-ribi. ⁴³ Tai tahe wiwese wese aõkõ ròhõtynyrenyre Jesuisi-di. ⁴⁴ Inyõ riròtenykemy ixi-di ratximyhỹ, ihãrele tahe inyõ rimyõhyre.

⁴⁵ Tahe soldado mahãdu ròðsemy rare rimyõhyylemy fariseu mahãdu-ò xiwewahidỹñdu mahãdu wedu-ò. Tahe soldado-ò rỹñraxirenyre: –Aõherekibo tedyõteri. ⁴⁶ Tahe dirawyònyde: –Timybo inyõ kowa hãbu wesemy rarybeõhyre rybe iwitxira wihikỹmy tii rarybere. ⁴⁷ Tahe fariseu mahãdu rarybere: –Kaiboho aõbo tule araitxenanyrenyra. ⁴⁸ Inyboho mahãdu reny-ribi moõ rityhynyõhyymyhỹre, fariseu mahãdu wahe, wedu mahãdu wahe. ⁴⁹ Inyõ rityhynyre, tahe tiiboho Moisesi bede ywina rieryõre tai Deuxu aõhòkỹmydỹñnana-txi idi rehukre. Aõhòkỹmydỹñnana-ò ritamadỹñnykre. ⁵⁰ Nikodema iyreny-ki ratximyhỹ. Fariseu mahãduõ tii rare, juhoo Jesuisi raraò rare wahe. Tii heka rarybere

imahãdu-ò. ⁵¹ Juhuu roholamyhỹre aõhebo rotỹỹnyraò wahe idi tahe ibinakeki riròtenykremy riijemyhỹre. Kia tahe iny bede ywinareny rare. ⁵²⁻⁵³ Tahe rirawyònyrenyre: —Kai wa tule Kalileia mahãduõ atxiteri. Tyyriti-ò beteheke timybo rarybereriò: —Kalileia-ribi rybeduõ ròhònyõtyhy wahe.

8

¹ [Tahe ibutumy he tasỹ-ò reareare. Iu tahe Jesuisi rare Oliveira hãwãlò-ò. ² Biura-di tahe dòòsede Deuxu dohodỹỹna heto-ò ixiby. Sõwemy iny tamy rare; Jesuisi ronyre; ribedeerynyre. ³ Hãwyyõ ratximyhỹ hãbu wixiraõ-wana wasimy ratximyhỹ. Tahe inywixiraõ itxireny reare. Tai tahe Deuxu rybe erydỹỹdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rỹikemy iny sõwehekỹy-ki. ⁴ Tahe raryberenyre Jesuisi-ò: —Bede erydu: —Kahãwyy tỹwe rare inyõ itxi reara. ⁵ Iny bede ywina Moisesi riwawahinyré tahe rarybere mana-di rurumyhỹkemy. Tahe aõmybo kai mynarybeke. ⁶ Tiiboho kiamy rarybere Jesuisi riurihire timybo rarybekemy. Tai tahe ibinamy tamy rarybekemy idi ratxireri. Jesuisi tahe suò resera ròritidỹỹkremy tebò-di suki riritinyra. ⁷ Tahe ritỹỹraxinyhy ihỹmyhỹ. Tahe Jesuisi rỹire; rarybere: —Inyõ òrarukõmy ratxirerile, tii mana-di juhUU tamy rehukre. ⁸ Ixityrele sỹ Jesuisi ròritidỹỹre suò. ⁹ Kia rybe-ò roholarenyreu, tahe rexitarenyre sohoji sohojilemy, tarayky dori ribinadỹỹnyrenyra. Matuari mahãdu tahe juhUU rexitare. Ikonanatyhy dori rare, tahe Jesuisi

hãwyywanale tai rỹire. ¹⁰ Jesuisi retehere: —Hãwyy sohojilemy robire rỹĩraxire tamy: —Hãwyy, titxibo mana-di arubudỹĩmy rybedu mahãdu rirahura. Inyõ aõhe arasỹnyõhyyra. ¹¹ Tahe dirawyõnyde: —Anokõre, Wahĩ. Tahe Jesuisi rarybere: —Jiarỹ tulere! Mahe, òraruna-txi tahe ixyby ixẽõmy.]

¹² Ixityre Jesuisi rarybere tamy: —Jiarỹ wabede loosõna rare. Inyõ wahemy kanakeki, bedede luru-ki rariaõtyhy. Tii heka loosõna-di tarayky-ki rarekre. ¹³ Tahe fariseu mahãdu tamy rarybere: —Aõkõre, kai wa iximy tarybeteri tai tahe arybe inatyhymy aõkõ rare. ¹⁴ Jesuisi dirawyõnyde: —Inatyhymy iximy rarybereri jiarỹ, tahe warybe inatyhy rare, jiarỹ dori reeryre titxiribibo anade, tule tiobo arakre reeryre. Kaiboho tahe kia teeryõtenyete. ¹⁵ Kaiboho waywisidỹĩmy tadiòlõnyete, ihãre tahe òbitimy tiwaywinytenyõte tiwaerytenykõteki. Tahe jiarỹ inyõ reywinyõreri. ¹⁶ Jiarỹ inyõ ariwinykeki, waywisidỹĩna tahe òbiti rare. Jiarỹ dori ixiwanale aõkõ rare. Waha, wadeòdỹĩdu wawana raremyhỹ. ¹⁷ Abede ywina-ki kia rybe riritinymy rỹimyhỹre: —Inatxi hãbumy wiwesehyylemy rarybekeki kia tahe inatyhy rare. ¹⁸ Jiarỹ iximy rarybemahãre tule Waha wadeòdỹĩdu wamy adeereny rarybemyhỹre. ¹⁹ Tahe tiiboho Jesuisi-ò rỹĩraxirenyre: —Titxibo boo ratximyhỹre. Jesuisi rarybere: —Kaiboho tiwaerykõmahãtenyete, Waha tule teeryõmahãtenyete. Kai biwaerybenyõkeki, tule Waha bierybenyõtyhy. ²⁰ Kia Jesuisi rarybere Deuxu dohodỹĩna hetowo-ki, iubeweri yrubudỹĩna ube-ki. Tahe inyõ rimyõhyyre,

ibededỹnanamy aõkõ bede rỹireki.

²¹ Iribi tahe ixityre tamy rarybere: –Jiarỹ he arakre karibi. Kaiboho biwaijebenykre tahe aõrarurenydile burubenykre. Boiõtyhy titxibo arakre-ò. ²² Tai tahe judeu mahãdu widee raryberenyre: –Inatyhymy aõbo tii rexirubunykre. Tii raryberaki: –Titxibo arakremy boiõtyhy, myki tuu idi rõhõtynyrenyre. ²³ Tahe Jesuisi rarybere: –Kaiboho kaludu toite; jiarỹ aõkõre, biu ludu rare. Kaiboho bede ludu toite, jiarỹ tahe kabede ludu aõkõ jiarỹ rare. ²⁴ Tai heka adeereny rarybereri aõrarureny-di burubenykremy. Inatyhymy jiarỹ tii rare: –Iwese rarybere wesemy. Tahe kia warybe bityhynyõbenykeki, aõrarureny-di burubenykre. ²⁵ Tahe tiiboho rỹraxyrenyre Jesuisi-ò: –Mobo he tate. Jesuisi dirawyõnyde: –Timybo adeereny rarybewãhãre, juhuu wahe. ²⁶ Jiarỹ sõwemy rỹire aõna aõnamy umyreny ararybeke umyreny ariywinyke ta ararybekre Waha tuu wadee rarybelemy. Tii diwateõnyte tii inatyhymy rare. Irybelemy bede iny-ò ararybekre. ²⁷ Rieryõhyre tamyreny rarybere, tybomy. ²⁸ Kaiboho heka biwatamadỹnybenykreu, bierybenybenykre mobo jiarỹ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynananyhỹre wese, rarybemahãre. Kia tule bierybenykre. ²⁹ Wateòdỹỹdu wawana raremyhỹ. Iximy riwariõtyhy, jiarỹ tamy wimy rewinyhyymahãreki. ³⁰ Kiamy tarybe rahudi tahe, sõwemy iny rityhynyre.

³¹ Judeu ityhydỹỹdu mahãdu-ò Jesuisi rarybere:

—Kaiboho warybe tyhy-di mohõtinybenyhyykeki, inatyhymy watyhydỹdu waheludumy boibekre. ³² Inatyhyna tahe bierybenykre. Kia dori aratarenyke, deòdumy aõkõ boibekre. ³³ Dirawyònydenyde aõkõre inyboho Abraõ riòkõre roire, tiu heka modeòdumy roirekõmahãre. Timybo tarybeta: —Deòdu-ribi riwatakemy. ³⁴ Tahe Jesuisi tamy rarybere inyõ òraru-di hyy rexiòrarunykeki, tii òraruna deòdu wese hyyle rare. ³⁵ Deòdu heka heto wedu ijoihyymy aõkõ rarekre. Iwedu ixinamy rakre. Riòre tahe ijoihyymy rare. ³⁶ Tahe Deuxu Riòre heka ixinamy arateònykeki, tiu òraruna deòdu wesemy ixiby bonybenyõtyhy. ³⁷ Abraõ riòkõre inatyhymy toite. Kia tahe reeryre. Ihãrele tahe biwarubunybenykemy atxitenyteri warybe dori araykywo-di aõkõ ratxireri. ³⁸ Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyte tuu tewinytenyteri. ³⁹ Rirawyònyrenyre: —Wahareny heka Abraõ rare. Jesuisi rarybere: —Abraõ riòremy inatyhymy toite-wana, Abraõ aõmydỹnana iwesemy biwinybenyke. ⁴⁰ Katahe warubudỹmy wadi atxitenyteri. Inatyhyna Deuxu-ribi raholaremy, adeereny rarybemahãre, tai tahe warubudỹmy atxitenyteri. Abraõ tahe tiu tahe tuu rotỹnyõtyhy. ⁴¹ Kaiboho heka borentytyhy wesele tatỹnymahãtenyte. Dirawyònyde: —Aõkõre, jiarỹboho waxiriòre aõkõ roire. Deuxuhyyle iny tybyreny rare. ⁴² Tahe Jesuisi rerawyònyre: —Deuxu boo inatyhymy rare-wana inihe kaiboho waluurenre. Jiarỹ dori Deuxu-ribi anade. Ixidee wimy aõkõ anade tii

diwateònyde. ⁴³ Aõherekibo teerytenyõte warybe. Isiratyhyre aõbo ijohona. Aõkõre, ityhydỹỹ isirare adeereny. ⁴⁴ Kaiboho Diabo riòre toite tamywimy biwinykemy atxitenyteri. Tii juhoo rubudỹỹdu hyy rare. Tii heka raruireri inatyhywesehekỹle wahe. Tii ruidu rare. Ruiwedu tii rare. ⁴⁵ Kaiboho heka tiwatyhynyõhymahãtenyete inatyhyna dori jiarỹ rarybemahãre. ⁴⁶ Inyõ inihe wamy rarybeõtyhy jiarỹ òrarudu raremy. Adeereny inatyhynamy rarybereri. Aõherekibo tiwatyhynyõteri. ⁴⁷ Iny Deuxu-ribi ratxireri, Deuxu rybe roholamyhỹre. Kaiboho Deuxuhõrõ aõkõ toite. Teòdu aõkõ toite. Taita warybe-ò taholaõteri.

⁴⁸ Jesuisi-ò tiiboho dirawyònydenyde: — Inatyhymy rarybewãhãrenyre. Kai Samaria mahãdu tate. Kaludu mahãdu aõkõ tate. Kai tyytybybina dire. ⁴⁹ Jesuisi rirawyònyre: —Aõkõre, tyytybybina-di aõkõ watxireri. Waha tahe rewowydynywãhãre. Kaibohole tiwabinadỹỹnymahãtenyete. ⁵⁰ Wowodyna ixi-di aõkõ reijereri. Waha tahe kia aõmydỹỹnanamy riywinykre, tii rierymyhỹre. ⁵¹ Inatyhytyhymy adee ararybekre: —Inyõ warybemy reòbykeki, tiu rubumy tii robiõtyhy. ⁵² Tai judeu mahãdu rarybere: —Katahe inatyhymyhe inydeereny aerysydỹỹna rỹira tyytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: —Inyõ warybemy reòbykeki tiu rubu urihixinamy roiõtyhy tamy. ⁵³ Kai aõbo inytybyreny Abraõ ratyre awikemy aõbo ixi-di tahõtinyinmahãte. Abraõ rurure Deuxu rybemy rybenadu amahãdu tule rurure. Mobo

raremy he tahõtynmahâte. ⁵⁴ Tahe Jesuisi rirawyònyre: —Jiarỹ ixi-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhỹke aDeuxumy raremy tu tarybeteri. ⁵⁵ Tahe aõkõ teeryõtenynte. Jiarỹ tate reerymahãre. Jiarỹ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reòbymahãre. ⁵⁶ Boreny Abraõ, wamy dobide, wabededỹnana kanakremy tuu dobide, wabededỹnana kanakremy tuu dobide tai tahe reysatyhymy rare. ⁵⁷ Tahe judeu wedu mahãdu rarybere: —Kai 50 beòramy aõkõ atxiteri timyrekibo tarybeta Abraõ tabitemy. ⁵⁸ Jesuisi dirawyònyde: —Abraõ reaõule, Jiarỹ rarehymahã.

⁵⁹ Tahe manadile rimymy reserenyre idile rirabunykemy. Jesuisi tahe rexiwòmý iribi ròhònymy rare, dohodỹna heto-ribi.

9

¹ Jesuisi rariamy rareu, tii robimy rare hãbu ruetàmy. Tii iruetàhàkỹmy ratohouãmy herinanyre. ² Ierydỹna mahãdu rỹrãxire tamy. Erydỹdu, aõherekibo hãbu ratohouãnyra iruetymy, ise tyby iòrarudireki aõbo ada taòrarumy aõbo. ³ Tahe Jesuisi rirawyònyre: —Tahe aõkõre tyby ise-ke aõkõ tiike aõkõ. Deuxu ruru wiji riteòsinykremy tahe tii kiawesemy rohonyre. ⁴ Wateòdỹdu aõmydỹnanamy arotỹnyrenykemy watxiwãhãrenyre. Inyboho rikiwinyrenyke ibededỹnanamy rỹikreu, iwese txumy rỹikre wese tahe rummy heka kanakre tai raaõmysỹdỹõmyhỹre.

⁵ Kabede-ki watxiwãhãreòle tahe jiarỹ bede ludu mahãdu loosònatyhymy jiarỹ rare. ⁶ Tarybe rahudi tahe rarybexinyre suò idi tahe subororomy ritxienyre. Idi ta hãbu rueyre-ò subororo ritidire. ⁷ Tahe hãbu ruetà-ò rarybere: —Make wa bexisuhòke Silòe ahobe-di. Silòemy ninadu heka iny rybe-ki deòdỹỹna wesemy rare. Hãbu tahe rare, risuhore, dòòsede robimy. ⁸ Tahe ierydu mahãdu, tuu robire idi itxeredu mahãdu raryberenyre widee: —Kabe hãbu ixitòedỹỹdu rare, nierумы kowa-ki rexitòenymy rononymỹre rare. ⁹ Ijõ rarybere tule rare. Ijõ rarybere: —Aòkõre, iwesele tahe iwitxirari. ¹⁰ Rỹỹraxirenyre tamy: —Timykibo arue reytera. ¹¹ Rirawyònyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò aõ bisuhòke. Tahe rare, resuhore, tai rabimy watxireri. ¹² Rỹỹraxirenyre titxibo tahe tii rara. Rirawyònyra: —Reeryõre.

¹³⁻¹⁴ Kia ruedeytena Jesuisi riwinyre sabado txuu, judeu aõmysỹdỹỹna txu aõkõ. Tahe tiiboho hãbu ridyrenyre fariseu mahãdu-ò. ¹⁵ Ixityre hãbu-ò rỹỹraxirenyre: —Timykibo riteytenyra. Tahe rirawyònyre: —Subororole waruetyre-ò ritidira, idi resuhòra, iule tahe retehera. ¹⁶ Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakỹny sabadotxu bede ywina riywinyõhyyre. Tahe ijõ imahãduõ rarybere: —Hãbu òraruduõ tiu deytenuwihikỹõ kia wesemy riwinyõtyhy. Tai tahe wiribi hitximy raraykynyrenyre. ¹⁷ Tahe ixityre hãbu-ò rỹỹraxire: —Tii arue arue riteytenyra: —Tai tahe timybo tuu

marybekre. Hãbu rarybere: –Tii Deuxu rybemy rybeduõ rare. ¹⁸ Tahe judeu mahãduõ rarybere: –Ise-wana tybywana widee ararybekekile, arityhynykre. Tai riteõnyre tybybohoõrysomy. ¹⁹ Rehemynyreu, tahe tamy rarybere: –Kaa aõbo ariõre rare. Inatyhymy aõbo iruetàmy reare. Timykibo tahe wiji robira. ²⁰ Tahe tybyboho rirawyõnyre. Inatyhymy wariõreony rare. Iruetàlemy ka reare. ²¹ Reerykõrenyry timykibo retehera. Irueriraynyre dori, reeryõhyre. Tamy marybebemyke. Ibeõra dire ka, iximy relyyleke. ²²⁻²³ Tybyboho ruberumyhõrenyry judeu mahãdu lau. Judeu mahãdu dori, rarybemyhõre: –Inyõ Jesusimy rarybekeki, tii Kristu Deuxu deõdõõna raremy rarybekeki, tahe dohodõõnawo-ribi riteõnykemy idi rõira. Tai tahe hãbutybyboho kia wesemy raryberenyre. Tii ibeõra dire: –Tamy marybebemyke.

²⁴ Juhuu iruetàmy raremyhõõ ixityre rõtedyõmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowydynyke. Tahe tii rarybere: ²⁵ –Tii òrarudu rare, reerykõre. Sohoji aõmydõõnana reeryre. Juhuu waruetàle heka reeryre, wiji tahe retehereri. ²⁶ Tahe ixityre tamy rõõraxire: –Aõbo tii riwinyre. Timybo arue roire. ²⁷ Hãbu rarybere: –Adeereny tuu rarybere tahe taholaõhytyenyta. Aõherekibo ixityre ijohonamy tarybetenyteri. Ierydõõnamy boibekemy aõbo atxitenyteri. ²⁸ Tuu raryberenyre aõbina binalemy. Kai heka ijoiõ atxiteri. Jiarõboho Moisesi erydõõna jiarõboho roire. ²⁹ Deuxu

Moisesi-ò rarybemyhÿre. Kiamy reeryrenyre. Ka hãbumy tahe aomy raholaõmahãreny, tiludubo rare. ³⁰ Kia wa riwateytenyra bededòtidÿÿna urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare. ³¹ Deuxu wa òrarudu ixitòedÿÿna-ò roholaõtyhy. Kia reeryrenyre. Tahe inyõ Deuxu rityhynykeki tamywimy rÿirakeki, kia-ò Deuxu roholakre. ³² Bede rexidelenyre, inyõ roholatyhy iruetàmy raumynyre heka reytere. Inyõ tiu riwinyõre, wiji tahe diwinyde. ³³ Kia hãbu Deuxu-ribi nokõduõ aõkõkeki tiu aõ riwinyõtyhy. ³⁴ Tahe fariseu mahãdu aõbinahakÿlemy tuu rarybere: –Kai uladumy teateu, òrarudutyhymy tate. Kai aõmybo biwabedeerynybenykremy aõbo wadireny tahõtinyteri. Tahe riteònyre dohodÿÿna heto-ribi. Ihyomy riteònyre.

³⁵ Kia-ò Jesuisi roholareu hãbu riijere tahe rÿÿraxire tuu: –Kai Deuxu Riòre Hãbutyhyhykÿ aõbo tetyhynyte. ³⁶ Hãbu rarybere: –Mobo tii rare, Wanyrÿ, arityhynykemy watzireri. ³⁷ Wamy wa tabita, jiarÿleheka watzireri. Adee rarybererile watzireri. ³⁸ Tahe rarybere: –Wanyrÿ aratyhynyra he. Tahe hãbu Jesuisi riwowydynyre. ³⁹ Jesuisi rarybehyra: –Jiarÿ anade kabede-ò iny ruetà aritobixidÿÿnykemy; tule robimyhÿre mahãdu ariruetàdÿÿnykre. Iny òwydÿÿnamy anade. ⁴⁰ Fariseu iòhòmy iribi rÿimyhÿ roholare irybe-ò. Tahe tamy rÿÿraxire. Inatyhykõ aõbo ka jiarÿboho tule waruetàrenyre. ⁴¹ Jesuisi rarybere: –Aruetàmy ahãtenyteki, aòraruna-di aõkõ toite. Tahe tarybetenyte

reerywãhã, rabiwãhãre. Tai aòraruhyy-di toite.

10

¹ Inatyhytyhymy adeereny ararybekre: —Inyõ budoeni yrubudyỹna ijõtòbòna-di, ralòõkeki, tii tahe wasidu ixiwatxidỹỹdumy rare, raòwònymy heka ralòmhyhỹre. ² Ijõtòbòna-di ròtedu, tii budoeni-di itxeredutyhy rare. ³ Iu ijõtòbòna-ò rehemynymyhỹreu, ijõtòbòna ludu tamy riraynymyhỹre. Tule budoeni irybe rierymyhỹre. Sohoji sohoji-ò ininimy tamy ryrymyhỹre, tahe idi ròhònomy ridymyhỹre. ⁴ Ihõrõ ahana-ò ridyreu, tii iko-ò rỹimy idi ramyhỹre. Riheludunymy idi raremyhỹ rierymyhỹreki irybe. ⁵ Budoeni ieryõdu riheludunyõtyhy, irybe rieryõreki. Iny ieryõdu-ribi rahenykre. ⁶ Jesuisi tamy kia bede eryna ijyymy relyyre. Tiiboho tahe rieryõhyyrenyrene timybo ibede erydỹỹnamy rororerimy.

⁷ Tahe Jesuisi ritỹnynyre tamyreny: — Jiarỹ budoeni ijõtòbòna wesemy rãimahãre. ⁸ Ibutumy iny wakõule rehemynyrene wasidu ixiwatxidỹỹdumy rỹiramyhỹ. Wabudoeni ityhydỹỹdu wesemy rỹirerimy ihỹre. Tiiboho wasidurybe-ò roholaõhyymyhỹrenyrene. ⁹ Jiarỹ ijõtòbòna wesemy rãiwãhãre. Inyõ wamy ralòkeki, tii heka tarasanaõmy rarekre. Iwese wabudoeni ralòmhyhỹre idi ròhònomyhỹre asi wiwihikỹmy riroximyhỹre wesemy, tule ityhydỹỹdu mahãdu rỹirakre, bedeòbyna wiwihikỹ ritakremy. ¹⁰ Wasidu heka rubudyỹmy nade, bedehudumy wasimy, jiarỹ tahe anade inyõ umytuedeòna ariwahinykremy, irutyhytyhy wihikỹmy wiji rỹirakremy. ¹¹ Jiarỹ budoeni-di itxeredu wihikỹ

rare. Ihyy ta waumy ariwahinykre teròwyrenymy.
¹² Inyõ budoeni-di itxeredumy deòdumy risỹnykeki, tii riwisinanyõtyhy, tii dori budoeni wedu aõkõ rare, deòdule rareki. Tahe iròdu brebunaõ tamy kanakeki tahe rahenyke iribi, tai ijõ rimyke, ihona tahe raòrunyke. ¹³ Deòdu heka rahenyke tii iwedu aõkõ rareki, tii aõmy aõkõ idi rõhõtinyinmyhỹre, iòwydimy aõkõ. ¹⁴⁻¹⁵ Jiarỹ heka itxeredu wihikỹ rare wabudoeni riwaerymyhỹre. Jiarỹ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iòraru-ki tahe waumy ariwahinykemy idi wãhãre. ¹⁶ Jiarỹ wabudoeniõ-di watxiwãhãre. Aõ kabede-ki aõkõ. Ibutumy aributunykemy idi watxireri. Tai tahe sohoji ijoihyylemy heka roikre. Ibutu-di itxeredumy ararekre. ¹⁷ Tai heka Waha waluure, waumy ariwahinykreki wahe. Ihãrele tahe ixyby idi arexiumydỹỹnykre. ¹⁸ Inyõ heka ixideewiõkeki riwarubunyõtyhy. Arexiwahinykre tamyreny riwarubunyrenykremy. Ixideewikreu, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

¹⁹ Kia rybe òraru-ki judeu mahãdu rybe rexi-jeijeinyre. ²⁰ Sõwemy iny ritxiõnymy rarybere: —Tii tyytybybina-di ratximyhỹre ada raitxỹtemy aõbo ihỹre. Aõherekibo tamy taholamahãtenyte. ²¹ Ijõ tahe rarybere: —Aõ tyytybybina-di aõkõ rarybemyhỹre. Tyytybybina aõbo hãbu ruetà riruedỹỹnyõtyhy.

²² Jerusalẽ hãwã-ki heka beòrahyy rare. Worana bedehesi hetxina Tỹmyradỹỹna rỹire.

23 Salomaõ Ube-ki, Deuxu dohodỹyna heto ubeõ-ki. 24 Jesuisi rariamy ihỹmyhỹ. Tahe judeu mahãdu rirurawonyre itỹraxidyỹmy. Tiwese bededyỹnananybo nohõtidihy bede ariwyrenykre. Kai inatyhymy Kristumy tate-wana, tahe manarybeke itỹnymy. 25 Jesuisi dirawyõnyde: –Rarybere wahe, tahe kaiboho tiwatyhynytenyõhyte. Inatyhymy ierysmy mohõtinybenykeki, waaõmydyỹnana wiihikỹ rewinyamahãre-di betehebonyke. Wahani-di kia rewinyamahãre. 26 Kaiboho tahe tiwatyhynyõlemahãtenyete, wabudoeni wesemy aõkõ toite. 27 Wabudoeni warybe rierymyhỹre, riwaheludunymyhyre; jiarỹ heka ibutumy wabudoeni reerymahãre. 28 Tamy umytuedeõna rewahinywãhãre tiu heka ruruõtyhy. Inyõ waribi ridyõtyhy. 29 Waha wadee riwahinyre. Tii heka ibuturatyre rare. Inyõ iribi ritaõtyhy. 30 Jiarỹ Waha-wana sohojihyyle watxiwãhãre.

31 Ixityre tahe judeu mahãdu mana-di rirubunykre idi rỹire. 32 Tahe Jesuisi tamyreny rarybere: –Jiarỹ sõwemy bedeyõbyna inydee rewinywãhãre Waha ruru-di. Aõðrarukibo biwarubunybenykre. 33 Tahe judeu mahãdu rirawyõnyre: –Kai aõmydyỹnana wiihikỹle tewinyte. Kia òraru-ki aõkõ ijoi adi rỹireri mana-di arubudyỹmy Deuxumy binatyhymy tarybeteriki. Kai dorì hãbu tate, ihãrele Deuxumy texiniteri. 34-35 Jesuisi rarybere: –Abede ywina-ki ryberiti rỹire. Deuxu Rybe õbitihyymy raritinymy rỹire. Kiamy: –Jiarỹ rarybere: –Kaiboho Deuxu toite. Deuxu Rybe heka inyõ-ò diteõnyde. Kia

mahãdu tahe Deuxulemy rininire. ³⁶ Deuxumy tiiboho rininirenyre-wana, aõherekibo wadee takyarananyteri jiarỹ tule Deuxu Riðrelemy rexininireki. Waha dori, riwatamy diwateõnyde. Timykibo kaiboho tarybetenyteri Deuxumy ibinamy jiarỹ rarybererimy ³⁷⁻³⁸ Waha-ribi bedeòbyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenymy boibeke jiarỹ Waha-wana wãhãre tule Waha wawana ratximyhỹre. ³⁹ Kabedeu ixityre riijere Jesuisi rimyky tii rexitamy rexihedỹnyre.

⁴⁰ Jesuisi ixityre Jordaõ bero kowa weribi-ò reurore. Joaõ juhuu ròsebedỹmyhỹò rare. Taile tahe tii raremyhỹ. ⁴¹ Tahe sõwemy iny tamy roirenyre. Tamy rarybere: –Inatyhymy Joaõ bedeòby iny itxerenamy riwinyõre. Tahe ibutumy tii Jesuisimy rarybemyhỹre, inatyhy rare. ⁴² Sõwemy heka taile Jesuisimy rityhynymyhỹre.

11

¹⁻² Lazaru ibinamy roimyhỹ Betỹnia hãwã-ki. Marie, Marta-wana iseriðrereny rare. Juhuu Marie Jesuisi-wana raremyhỹu, tii Jesuisiwa tyre-ò tarinalỹnyrehekỹõ ritxiwire, idi tahe tarade-di rirubudỹnyre. ³ Lazaru ibinamy roimyhỹki tahe tiiboho riteðnyre Jesuisi-ò rarybekremy: –Wahĩ, abiòwa tyhy binanihikỹmy roireri. ⁴ Jesuisi kiamy roholareu rarybere: –Kabinana hãwã Deuxu wowodynamy tamy nade. Tule riwawowodynky jiarỹ dori Deuxu Riðre rare. Kabinina tahe rubuhyymy aõkõ tamy

rỹike. ⁵ Jesuisi heka ibutumy iluurenyre, Marta, Marie, Lazaru-wana. ⁶ Iu Jesuisi rieryreu Lazaru webinaduna, tahe taile ratximyhỹre, rerihãrele inatxixumy. ⁷ Iribi tahe rarybere taerydỹỹna mahãdu-ò: —Ròkòirenyke ixyby Judeia bede-ò. ⁸ Tahe ierydỹỹna mahãdu tamy rarybere: —Erydỹỹdu aõherekibo ixybynomy tamy tarybeteri judeu mahãdu adi heka riwisỹnomy rỹimyhỹ mana-di arubudỹỹmy. ⁹ Jesuisi dirawyònyde: —Txu heka waòinatxi òra bededỹỹnanamy rare. Aõhe inatyhy. Inyõ txumy rariakeki, tiu aõ òraru-ki reseõtyhy loosònamy dori ibutumy robimyhỹre. ¹⁰ Bede lurumy rariakeki tahe, aõ òraru-ki reseke, loosòna dori ihoõreki wahe. ¹¹ Tahe ijõmy Jesuisi tamyreny rarybere: —Iny biòwareny rõrõmy roireri. Tamy arakre ariixixanykremy. ¹² Tahe imahãdu rarybere: —Wanyrỹ tii rõrõmy roireri-wana bohe, reytekre. ¹³ Jesuisi heka rarybemyhỹ Lazaru rubumy roirerimy. Tiiboho tahe rõhõninyrenyure urile rõrõmy roirerimy. ¹⁴ Tahe Jesuisi ritỹnynytyhyra tamyreny: —Lazaru rurure. ¹⁵ Jiarỹ wa aòrarureny-ki wadeysamy watzireri tai watxiõraki. Ka tahe biwatyhynybenykre. Ròkòirenykre tamy. ¹⁶ Tome ierydỹỹna mahãduõ rare. Didimomy iniõre. Tamahãduõ rarybere: —Ròkòirenyke, tule tii-wana rukururenykremy.

¹⁷ Jesuisi rehemynyreu, Lazaru inaubiòwatumy hãloo iwòdỹỹwo-ki roimyhỹ. ¹⁸ Betỹnia Jerusalẽ hãwã-ribi sohoji urihixinamy roire. ¹⁹ Judeu mahãduy-ribi sõwemy doidenyde Marta Marieboho wotòenamy, iseriòreny

rurureki. ²⁰ Marta Jesuisi kanakre rieryreu, tahe ròhònnyre tii-wana witxi reakemy. Marie tahe tahetokile rononymhỹ. ²¹ Tahe Jesuisi-ò Marta rarybere: –Wahĩ, kakile atxiberi-wana waseritxòre rurukòhykyra ikuny. ²² Ihãrele tahe rekeryre ibutumy Deuxu-kò bexitòenykeki, tiki adeke kidiwahinykre. ²³ Jesuisi tahe tamy rarybere: –Aseriòre wa rubu-ribi kedexixakre. ²⁴ Tahe Marta rarybere: –Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku. ²⁵ Jesuisi rarybere: –Jiarỹ waixixanadyỹdu rare, umytedeõna wahidyỹdu rare. Inyõ riwatyhynykeki, tii rubu-ki roire hãrele, kedexixakre. ²⁶ Ibutumy irumy roirekeki, tiu rururenyõtyhy, tii dori riwatyhynyreki. Kai aõbohe kia tetyhynyteri. ²⁷ Tii dirawyònyde: –Kohe, Wahĩ, aratyhynywãhãre. Kai Kristu tate, Deuxu ritxòretyhy. Deuxu tuu rarybereki, bede-kò kanatekònyde wahe. ²⁸ Tahe Marta ròsere Marie taseriòre-ò rarybere: –Inyhĩ rehemynyreri, kai makremy rarybereri. ²⁹ Kiamy roholareu, tahe, wylemy rỹimy reare tamy rare.

³⁰ Jesuisi dori hãwã-ò ralòõlemy raremyhỹ Marta tamy raryberekile raremyhỹ. ³¹ Tii rỹimy ròhònnyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare. ³² Marie rehemynyre Jesuisi-ò. Tahe tii tuu robireu, resere iko-ò, tahe rarybere: –Wahĩ, kaki atxiberi-wana ikuny waseritxòre rurukòhykyra. ³³ Jesuisi Marta ibru-di tule judeu mahãduhi-di retehereu tule tii rabadewonihikỹre. ³⁴ Iule Jesuisi rỹỹraxire: –Titxiwexe tii tetiditenyte.

Tiiboho rirawyònyre: –Wanyrỹ, manake itxeremy. ³⁵ Jesuisi tahe rahinyre. ³⁶ Tai tahe judeu mahãduõ rarybere: –Betehebenyke sówemy heka tii Lazaru luure. ³⁷ Ijõ tahe rarybere: –Tii iny ruetà riteytenyre. Aõherekibo Lazaru irumy ratxireriule riteytenyõra.

³⁸ Jesuisi ixyby tawo-ki bederiòtiinyre. Tahe rariamy rare wabede-ò Lazaru suiwodỹwo-ò roire. Mana-di tahe ritxiotòbònyre. ³⁹ Tahe Jesuisi rarybere: –Mana bitake Marta tahe iseriõre rarybere: –Wahĩ, rarònyreri wahe inakubikòwa txumy dokuri txuu idi rỹira. ⁴⁰ Tahe Jesuisi rarybere: –Rarybere taheka, bityhynykeki, Deuxu rurumy bobike. ⁴¹ Tahe mana iribi ritarenyre. Jesuisi retehere biu-ò rexitòenyre: –Umy reàlãmy wahe watzireri kai wadee taholataki. ⁴² Wadee taholahyy atxiteri mahãte: –Kia reeryre, kata inysõwehekỹ òraru-ki kiamy rarybera adee, tai tiiboho rityhynyrenykemy wahe, kai tiwateònyteki. ⁴³ Kia rexihureu tahe ryryre: –Lazaru, bodohonyke wa ahana-ò. ⁴⁴ Kia rurumy roimyhỹ-ribi tahe dòhònyde. Iwa heka tebò-wana widee ritỹtenylemy roimyhỹ. Irati tahe tyybese-di ritỹtenymy ihỹmyhỹ. Jesuisi rarybere: –Biesebenyke wa ixinamy rake.

⁴⁵ Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy robireu tahe, rityhynyre. ⁴⁶ Ijõ tahe fariseu mahãdu-ò roirenyre tamy relyykemy aõbo Jesuisi riwinyremy.

⁴⁷ Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu

ributunyre. Dohodỹỹna mahãdu wedu heka imahãduni rare. Tahe inyõ rarybere: –Ka hãbu heka aõwiihikỹ sõwemy diwinymyhỹde. Aõhebo he rokotỹỹnyrenykre. ⁴⁸ Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke inysỹ rahurenykre. ⁴⁹⁻⁵⁰ Kaifa imahãduõ rare. Kabeòrau tahe tii ibutu xiwena wahidỹỹdu wedu rare. Tahe tii rarybere: –Kaiboho aõ teeryõhyytenynte. Hãbuõ tahe rurukre ibutu inydee. Tai tahe ibutu iny itueõtyhy. ⁵¹ Kia heka irayky-ribi aõkõ ròhònyre. Deuxu irayky-ò ritidire, tii dori xiwena wedu tyhy rare kabeòrau. ⁵² Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rỹira mahãdu wahe. ⁵³ Itxuule tahe Jesuisi rubudỹỹmy ròhòtinyrenyre.

⁵⁴ Tai tahe ihãwãy-ki rariaõre, Judeia mahãduy-ki. Tahe iribi rexitare bederahy-ò iòhòmý. Hãwãõ-ò heka rare, Efraï heka inire. Taile taery mahãdu-wana ihỹmyhỹ. ⁵⁵ Judeu mahãdu worana bedehesi iòhòmý rỹimyhỹ Pascoa heka inire. Ritelenykõule heka sõwemy roirenyre Jerusalẽ hãwã-ò, tai rexiwinyrenykemy iwese bede ywina rarybere wese Pascoakomy wahe. ⁵⁶ Sõwemy iny Jesuisimy robikemy rỹimyhỹ. Tahe Deuxu dohodỹỹna hetowo-ki widee rarybemyhỹre tahe rarybere: –Kanakre aõbo Jesuisi worana bedehesi-ò. ⁵⁷ Xiwena wedu fariseu-wana juhúu inyõ rarybemahãre: –Inyõ Jesuisimy robikeki, tuu wadeereny kanarybekre, tii ramykremy

wahe.

12

¹ Jesuisi rare Betÿnia hãwã-ò Pascoa worana bedehesi rÿikrekoki. Debòsohoji txumy rauhenymy rÿimyhÿ tamy. Tai heka Lazaru rasÿnymyhÿre rubu-ribi rexixare-ribi wahe. ² Martaboho tahe rÿsÿna wiutàdãna riwinyrenyire Jesuisideewina. Lazaru Jesuisi-wana riroxikremy rononymhÿ. Tahe Marta tamyreny rÿsÿna riwymyhÿ. ³ Marie tahe sōwemy aderòna lÿnyre-di ratximyhÿ, iòwyhykÿre heka. Tahe tii Jesuisiwatyre ritxiwire idi tahe taradedile risuhore. Heto tahe tÿnyrehekÿlemy roire. ⁴ Judasi Isariò tule Jesuisi erydÿÿnaõ rare tii tai ratximyhÿ. Tii Jesuisi rityhenykremy tii raremyhÿ ihewo-ribi. Tii tahe rarybere: ⁵ —Kaa aderòna heka iòwyhykÿ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy. ⁶ (Judasi heka iny aõkõ mahãdu luu aõkõ rare. Erydÿÿna mahãdu nieru rubudÿÿdu tii rare. Kia nieruõ tahe ixideele ritosinyemyhÿre. Tai tahe aderòna òwy ixidee ributunykemy idi ratximyhÿ). ⁷ Tahe Jesuisi rarybere: —Ixinamy wawatyre ritxiwike, wahãloo-ò waherina heka riryrymy tuu ritxiwireri. ⁸ Kaiboho heka aõu biwiòhenanymy ahãbenyke iny aõkõ mahãdu awanarenny dori rarehyymy rarekre. Jiarÿ tahe kaki aratxihyyke aõkõ rare.

⁹ Judeu mahãdu Jesuisi rehemynyneriò roholare. Tahe sōwemy iny tamyreny nade itxeremy. Tule Lazaru-ò itxeremy nade rubu-ribi rexixareki. ¹⁰ Tai tahe xiwewahidÿÿdu

mahãdu wedu tule Lazaru rubudÿÿmy rarybere. ¹¹ Lazaru òraru-ki dori sõwemy judeu wedu Jesuisi rityhynyre.

¹² Itxubiòwau tahe Jesuisi nade Jerusalẽ-ò kia-ò tahe roholare ibutumy worana bedehesi ludu mahãdu. ¹³ Tai tahe roirenyre tii-wana witxi reakemy horeru riwyre ityre-di kanakre. Ryryrenyre Jesuisi-ò: –Waiòlòreny, kai arawowydynyneri, kai bedeòbydÿÿdu tateki! Kai Deuxuni-di tateri. Kai judeu Iòlòtyhy tate. ¹⁴ Jesuisi nade jumenta riòre tyre-ki, tuu dori ihetxina tyyriti-ki roire wesemy. ¹⁵ Kiamy wahe roire:

–Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

¹⁶ Iery mahãdu kia rieryòhyre juhuu. ¹⁷ Iribi tahe tõhõti itxi reare ritidÿÿna hetxina-ki roiremy, Jesuisi biu-txi ròsemy rareu wahe tõhõtireny itxi reare. Tule sõwemy iaõmydÿÿnana rybe hetxina-ki riritinymy rÿimyhÿre. Kia-di tahe idi tõhõtireny reare. ¹⁸ Inyõ itxeredu heka Lazaru ixixanamy relyyre. Tai tule iny sõwemy doidenyde. Kia Jesuisi riwinyreò heka roholarenyre. ¹⁹ Tai tahe fariseu mahãdu widee raryberenyre: –Ibutumy ihemy roirenyre. Timyõre, aõhe heka rikisÿnyrenyòtyhy.

²⁰ Inyõ worana bedehesi-ki grego rybedu mahãduõ ratximyhÿ. Tii tai Deuxu reàlakemy ratximyhÿ. Tii Besaida hãwã ludu-ò Kalileia bede luduõ ratximyhÿ. ²¹ Tahe grego rybe mahãdu tamy rarybere: –Wanyrÿ, jiarÿboho, Jesuisimy arobikemy watxirenyneri. ²² Filipi tahe

Andre-ko relyyre. Ta wiwana roirenyre Jesuisi-ò.
²³ Jesuisi rarybere: —Aõkõra, Wabededỹnana iõhõra Deuxu Riõre Hãbutyhyhykỹ rubuna-ò, wahe. ²⁴ Inatyhymy adeereny ararybekre: — Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixiwanahyyle ararekre. Arurukre-wana sõwemy araratynykre. ²⁵ Inyõ ixiluukeki heka, ruruke. Kabede-ki tahe ixiluuõkeki, tii rexiywinymy umytuedeõna-ò ratxike. ²⁶ Inyõ wadeòdumy ratximyhỹkeki, tii riwaheludunye. Tai titxibo aratxikeò tii wawana ratximyhỹke. Inyõ wadeòdumy rareke-wana, tii Waha riwowydynykre.

²⁷ Katahe wabedewonihikỹmy watzireri. Timybo ararybekre, Waha, kia rubu aõmydỹnana-ribi biwatake. My òsana arexitòenykre. Aõkõre, kiaòle heka kabede-ò anade. ²⁸ Waha, anityhy-ò iny riwowydynykemy watzireri. Iule tahe rybeõ-ò roholarenyre: — Kia rotỹnyre ihãre ta ixityre tuu rotỹnykre. ²⁹ Tahe iny sõwehekỹ kia rybe-ò roholare. Tahe rarybere: —Biumytxyle rare. Tahe ijõ rarybere. Aõkõre ýju rare. ³⁰ Tahe Jesuisi rarybere: — Waòraru-ki aõkõ kia rybe rỹireri, aòrarureny-ki, tamy boholabenykemy. ³¹ Wiji tahe ywisidỹna kỹnyikre, bedemy iny rỹira mahãdu-ò. Kia mahãdu iòlò, Satanasi, kanahitxidỹkỹkre. ³² Iu jiarỹ itxeò-ki riwaukokreu, ibutumy iny heka ixidee adiwiutàðanykre riwatyhynykremy. ³³ Iu tii kia rarybereu, tarubuna ritỹnynyre timybo rurukre. ³⁴ Iny sõwehekỹ dirawyònyde: —Jiarỹboho raholarenyre bede ywina-ò. Tii rarybere: —

Tiemy Kristu rarehyymy rarekre. Timybo kai tarybeteri: –Biwaukokremy. Mobo tahe Deuxu Riõre Hãbutyhyhykỹmy tuu tarybeteri. ³⁵ Tahe Jesuisi dirawyõnyde: –Urihimyõle loosõna awana rariamy ratxireri. Idi atxiteriule idi mariake, bede luru atxi kanakelau. Inyõ bede luruki rariakeki, tiobo rake rieryõhyyre. ³⁶ Waloosõna atxiteriule, biwatyhynyke waloosõnamy, taile waloosõna mahãduõmy boibeke. Kiarybe rahu-di tahe Jesuisi iribi rexitamy rexiwore. ³⁷ Tii sõwemy bedeõtiidỹõna ikoreny-txi riwinyre. Ihãrele tahe sõwemy rityhynyõre. ³⁸ Kia tahe Isaia tyyriti-ki roire, tahe iwesele tuu rarybere wese wiji rỹira rotỹõnyre:

–Wanyrỹ, Iny rybe tỹnydỹõnareny tiiboho rityhynyõhyyre, Deuxu taruru tamy riteõsinyrehãrele rityhynyõre.

³⁹ Tai rityhynyõhyyre. Isaia, Deuxu rybedu ijõmy ròritidỹõre:

⁴⁰ –Deuxu riruetànyre, irayky riteredỹõnyre. Tai rieryõhyymy robiõhyymyhỹre. Tiu heka Deuxu rityhynyõhyyre. Tiu riteytenyõhyyre.

⁴¹ Isaia Jesuisi loosõnamy robire. Tai tahe tuu ròritidỹõre. ⁴² Ihãrele tahe dohodỹõna mahãdu wedule sõwemy rityhynyre. Urile fariseu mahãdu òrarukile, ijõ-ò tuu rarybeõre, dohodỹõna mahãduy-ribi riòlòdỹõnyheny. ⁴³ Tiiboho dori Deuxu wowydyna luurenyõre inywowydynale luurenyre.

⁴⁴ –Iny riwatyhynymyhỹkeki, wadeòdỹõdule rityhynymyhỹre. ⁴⁵ Inyõ wamy robikeki, iule wadeòdỹõdumy robike. ⁴⁶ Jiarỹ loosõna wesemy

anade bede-ò. Tai tahe iny riwatyhynykeki, bede luru ribi ròhònyke. Tai heka anade. ⁴⁷ Inyõ warybe-ò roholake hãrele riywinyõkeki, tahe jiarỹ tii wiji ariywidỹnyõke. Jiarỹ dori tarasaduhyylemy anade. ⁴⁸ Inyõ riwatyhynyõkeki, warybe-ò roholaõkeki, ikonana txuu tahe ywisidỹna-ò ralòke, warybe-ò rityhynyõmyhyreki aõhõkỹmy dỹnana-ò heka kia ralokre. ⁴⁹ Jiarỹ ixi rayky-ribi aõkõ rarybemahãre. Wahale rybe wadee riwahinyhỹre. Kia wesele relymahãre. ⁵⁰ Deuxu rybe bede ywina-di diwateònyde umytuedeõna wahidỹna kia rare. Kiale heka reeryre.

13

¹⁻³ Pascoa worana bedehesi txumy txuu rỹire. Tahe Jesuisi rexieryre ixyby tyby-ò ròðsekremy ihỹre, ibededỹnana iðhòmy roireki. Tule rexieryre tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹna mahãdu-wana riroximyhỹreny. Judasi Isariò (Simaõ riòre) taile ratximyhỹ. Juhuu diabo tamy rarybere iruule Jesuisi rityhenykemy. ⁴ Jesuisi sòwemy taerydỹna mahãdu luure. Tai tahe rỹire, tatytyre ludu ritare òsuròna rimyre, idi rexiwetyataare. ⁵ Hynaro-ò bee ritxiwire taerydỹna mahãduwaa risuhokremy tahe òsuròna-di tawetya-ki ihỹmyhỹ-di iwa rirubudỹnyre. ⁶ Tahe Jesuisi rehemynyre Simaõ Pedro-ò, Pedro rarybere: –Aõkõre kai wawareny suròdòomyke. ⁷ Jesuisi rirawyònyre: –Kai heka teeryõte aõherekibo resuhòreri. Ihewo-ribi tahe bierykre. ⁸ Pedro

rarybere: —Aõkõre, wawasuròdòdỹỹõmy. Jesuisi rirawyònyre: —Arisuhòõkeki wawanahyy aõkõ mabeke. ⁹ Pedro rarybere: —Wawasohojile aõkõ bisuhokre, wadebò warati-wana tule wahe. ¹⁰ Tahe ritỹnyre Jesuisi; inyõ rõhõre-wana iwale rasuhòke. Iuhe ibutumy tyralemy rỹimyhỹre. Kaiboho yralemy toite. Sohoji tahe aõkõre. ¹¹ Jesuisi tatyhedỹỹdu rayky rierymyhỹre. Tai tahe rarybera, ibutumy aõkõ tyraremy.

¹² Jesuisi iwasuròdò rexihureu, tatytyre ludu retyynyra roxina-ò ròsere. Tamyreny rỹỹraxire: —Kaiboho teerytenyte. Aõhebo jiarỹ kia ratỹnyra. ¹³ Adeereny aritỹnykre. Kaiboho tiwaninitenyte anyrỹmy, aõhe inatyhy? Aerydỹỹdumy, inatyhy heka jiarỹ rare tahe òbitimy tarybetenyte. ¹⁴ Jiarỹ aerydỹỹdureny anyrỹreny heka awareny resuhore. Tai tahe kaiboho wiwa bisuhòbenykre. ¹⁵ Iwese jiarỹ rexideòsinyre wese kaiboho biwinybenyke. ¹⁶ Inatyhymy adeereny ararybekre. Deòdu dori tawedu ratyre aõkõ rare. Rybe-ò ijohonadu dori rybedutyhy ratyre aõkõ rare. ¹⁷ Kia warybe teerytenyte. Tahe biwinybenykeki bedeòbynatyhy adeereny kanakre. ¹⁸ Ibutumy umyreny aõkõ rarybereri jiarỹ araeryreny, aratarenyreki, wahe. Rybe tyriti-ki roire kiamy: —Kia wawana riroximyhỹrele heka riwatyhenykre. Ele elemy tuu rotỹnykre.

¹⁹ Wiji rarybereri heka wylemy kia tuu rotỹnykre. Tuu rotỹnykreule, kaiboho bierybenykre òbitimy raryberé wahe; jiarỹ biwatyhynybenykemy wahe. ²⁰ Inatyhytyhymy ararybekre: —Inyõ adee aditeònykre. Inyõ tii rityhynymy kididykeki, tii

riwadymyhỹre. Inyõ kidiwadykeki wadeòdỹỹdu ridymyhỹre, Deuxu rityhynymyhỹre wahe.

²¹ Tahe Jesuisi rabadewonihikỹmy rononymhỹ. Tahe rarybera: —Iny sohojiõ ayreny-ribi riwatyhenykre. ²² Tahe wii riijeriijerenyre. Mokobo rarekremy rõhõtinyrenyre. ²³ Jiarỹ, Joaõ Jesuisi weribi ranywỹhỹ, tii dori sõwemy waluure. ²⁴ Tahe Pedro wadee narybewasidi: —Tamy inihe myỹraxike mobo raremy. ²⁵ Tahe jiarỹ retorunyre: —Wanyrỹ, mowexe ratxireri. ²⁶ Jesuisi rarybere wadee: —Kia orotxu ituudỹỹ tamy ariwahinykrele tiikre. Tahe Jesuisi orotxu yre rituunyre idi tahe Judasi Isariò-ò riwahinyre. Tii Simaõ riòre rare. ²⁷ Tahe Judasi riyre. Iribi tahe Satanasi aõwesele tamy ralore. Jesuisi heka Judasi-ò rarybere: —Aõhebo botỹỹnykre wylemy makre biwinykremy. ²⁸ Tahe riroximy rỹimyhỹ mahãdu rierỹõre aõmybo Jesuisi rarybemyhỹ. ²⁹ Judasi Isariò dori nieru hyna yrubudỹỹdu heka rare. Tai tahe rõhõtinyrenyre Jesuisi worana bedehesi aõna aõna riwykemy riteònyre, ada iny aokõdu mahãdu-ò nieruõ riwahinykemy. ³⁰ Judasi orotxu yre riymy rahudi tahe rõhõnymy rare bede luru-txi.

³¹ Judasi rõhõnymy rahudi tahe Jesuisi rarybere: —Wiji tahe Deuxu Riòre Hãbutyhyhykỹ loosõnamy iny robimyhỹre tarakywo-ki. Tii heka jiarỹ rare. Deuxu-ò waòraru-ki wowydyna riwahinykre. ³² Deuxu loosõnamy tahe waki iny robikeki, Deuxu riwatoosõnyreri aõwesele ibutumy iny tuu robike. ³³ Waluudu mahãdu wariòre wesemy atximahãtenyte, umywanareny urihimỹòle ararekre, idi tahe arakre. Tahe biwaijebenyhãrele

waki mahabenyõtyhy. Iwese judeu mahãdu-ò rarybere wesele adeereny ararybekre: –Titxibo arakre-ò kaiboho boibenyõke. ³⁴ Bede ywina tỹmyra wese adeereny ariwahinykre kiamy wahe: –Wiluurenykemy wahe: –Iwese jiarỹ aluurenyre wese tule kaiboho wiluurenyke. ³⁵ Wiluurenykeki ibutumy iny rieryrenykre kai waerydỹna mahãdumy tate.

³⁶ Tahe Simaõ Pedro ritỹraxyre: –Wanyrỹ, titxibo kai makre. Jesuisi dirawyõnyde: –Titxibo arakre-ò wiji kaiboho boibenyõke, iribi tahe wahemy bodoikre. ³⁷ Tahe Pedro rarybere: –Wanyrỹ aõherekibo araõkre wiji ahemy waumy kie aõraru-ki ariwahinykemy watxireri. ³⁸ Inatyhymy aõbo aumy biwahinykre waõraru-ki. Inatyhytyhymy ararybekre: –Hãnie hãbu robukõule kai biwatxiõnykre inataõmy.

14

¹ Kaiboho bedetiidỹrenyõmyke bedewona-ki. Kaiboho Deuxu tetyhynytenyete, tai tahe biwatyhinykre. ² Wahasỹ-ki sõwemy sỹrỹrimyhỹre kialemyre heka tai. Kaweseõkeki adee inatyhymy rarybemahãre. Jiarỹ tahe arakre sỹrỹ adeereny ariwinykemy. ³ Ariwinymy arahudi tahe ixbyble aõrysomy adõõsekre. Tahe aradyrenykre titxibo-txi aratxireriò kaiboho tule matxibenykre. ⁴ Kaiboho dori teerytenyete titxibo wasỹry roire. ⁵ Tahe Tome rarybere tamy: –Wanyrỹ, titxibo makreò reerykõrenyete. Tai tahe timykibo asỹry reeryrenykre. ⁶ Jesuisi dirawyõnyde: –Jiarỹ wa ryy rare. Deuxu inatyhyna jiarỹ rare. Umytuedeõna

wahidỹỹdu jiarỹ rare. Inyõ waòrarukile Waha dee rakre. ⁷ Kaiboho tiwaerytenyete-wana tule Waha teerytenyete. Wiji tyhyule Deuxu teerytenyete, tuu tabitenyete. ⁸ Idi Filipi rarybere: –Wanyrỹ, boo inydee biteòsinyke, tai tahe awike. ⁹ Tahe Jesuisi rarybere: –Filipi, sõwemy bededỹỹnana umy-wana rewyre. Ihãrele tahe tiwaeryõte. Inyõ wadee kanakeki, Wahamy robike. Aõherekibo wadee tarybeta boo wadee biteòsinykemy. ¹⁰ Jiarỹ Waha-ki watxiwãhãre tule Waha waki ihỹre. Kia aõbohe tetyhynyõte rarybewãhãre, kia iximy aõkõ rarybewãhãre. Waha waki ratximyhy tii taõmydỹỹnanamy rotỹỹnyre waumy-ribi. ¹¹ Waha-ki watxiwãhãre, tule tii waki ihỹre, kia bityhynybenyke. Aõwiihikỹ rewinywãhãre òraru-ki biwatyhynybenyke. ¹² Inatyhytyhymy adee ararybekre: –Inyõ riwatyhynykeki, wawesele aõwiihikỹ riwinykre. Tahe watyreaõ riwinykre. Jiarỹ dori Waha-ò arakre. ¹³ Tai wanimy aõmy bexitòenybenykeki, tii tahe ariwinykre. Iny Waha-ò wowydyna riwahinykemy idi watxireri, iRiòre wahe jiarỹ rare. ¹⁴ Tai aõma wani-ò bexitòenybenykeki, tii tahe riwinykreadeereny. ¹⁵ Inyõ waluukeki tii wabede ywina riywinytyhyke. ¹⁶ Waha-ò arexitòenykre ijõ wiòhedỹỹdu adeereny kiditeònykremy waderòwmy. Tii aõu aõu adeereny hyyle rarekre. ¹⁷ Tii Deuxu Tyytybytyhy rare. Tii inatyhynamy rieryreny, iny bedede mahãdu wahe. Deuxu Tyytybytyhy ixidee ridykemy. Tuu dori robiõtyhy rieryõtyhy. Kaiboho tahe teerytenyete. Tii dori umywanareny ratximyhỹre,

aworeny-ki ratxikremy. ¹⁸ Jiarỹ heka ixisohojimy ararisidỹnyõtyhy. Jiarỹle adee adoosekre. ¹⁹ Wijile arurumy arakre bede-ribi. Bede bede mahãdu tiu wamy robiõtyhy. Kaiboho tahe wamy bobilebenykre, jiarỹ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre. ²⁰ Kia txuu kaiboho bierybenykre jiarỹ heka Waha-ki watxiwãhãremy. Kaiboho tasỹ waki ahãtenyte. Jiarỹ tule akireny watxiwãhãre. ²¹ Inyõ wabede ywinareny dikeki tahe, riywinykeki, waluudu rare. Waha tule iluukre. Jiarỹ tule iluutyhyre. Tamy tule arexideòsinykre. ²² Judasi tamy rarybere: (aõ Isariò aõkõ kỹny, iwitxiraõ.) –Wanyrỹ, aõhekremybo wadeereny bedexideòsinykre tahe bede bede ludu mahãdu-ò aõkõ wahe. ²³ Jesuisi rarybere: –Inyõ waluukeki, wabede ywina riywinytyhyke. Waha, heka iluutyhykre. Jiarỹboho tamy adoidenykre tamysỹmy. ²⁴ Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

²⁵ Tai arakrekoki tuu rarybereri adeereny. ²⁶ Tahe Deuxu Tyytybytyhy, awiòhedỹdu, tii araerynanykre ibutumy aõna aõnamy. Timybo jiarỹ adeereny raryberemy akananohõtiijaranydenykre. ²⁷ Ywina adeereny adiwahinykre waywina wahe. Iwese bede bede ludu mahãdu riwahinymyhỹre wese aõkõ ariwahinykre. Uritere nohõtityreõmy brebuõmy. ²⁸ Rarybere dori arakremy tule adoosekremy. Waha waratyre rare. Tamy he arakre. Kaiboho

waluukeki, beysabenykre tamy arakreu. ²⁹ Kaa bedede reakoki tuu rarybereri. Tuu reakreu tahe, kaiboho biwatyhynybenykre. ³⁰ Sõwemy heka adeeremy ararybeõkre, bedede dinodu dori tehemy nysõ iõhõmy ihõre, Satanasi wahe. Tii heka wadee iruruõhyre, riwateõnyõtyhy. ³¹ Jiarõ Waha luure. Rewinywãhãre aõbo Waha ariwinykemy riwaterany myhõre. Botamanyke: –Ròkõirenyke.

15

¹ Hãjutõ õwõna wese wihikõ jiarõ rare. Waha tahe bedede rade wysydõdu wese rare. Bede õbebure iratyõkeki iõ riõrõke. Iratydikeki iõsõmo iribi risihere. Tai tahe sõwetyhymy nihikõmy raratynyke. ² Kaiboho bedede rade-õ wesemy toite. Warybe-di aõsõmoreny aribireny resihemahãre. Katahe õbitimy toite bederatymy raratynykemy. ³⁻⁴ Kaiboho biwamymy wadi myikre. Iwese bedede radeõ raõrõõmyhõkeki irulemy rõikre raratynyke. Aõkõkeki ruruke. Kaiboho iwesele toite. Waki beãrenyõbenymy hõkeki, tiu Deuxudeewimy atxibenyõtyhy. ⁵ Jiarõ hãjutõ õwõna wese rare. Kaiboho ibede radeõ wese toite. Waki beerenybenykeki, jiarõ aki ararike, tai bederaty wese sõwemy maratynyke. Wahoõkeki tiu aõ biwinybenyõtyhy. ⁶ Inyõ waki rariõkeki, iwese iny bedede rade rubu-di rahuleke, tii iwesele inyõ rahukre. Juhuu rimyre, idi heõty-õ rehure, tai roomy hõre. ⁷ Kaiboho waribi boibenyõkeki, warybe õhõti-ribi rosaõtyhykeki, aõtaxina wadee bexitõenybenykre, tai ibutumy adee ariwahinykre. ⁸ Iwese bedede rade sõwemy raratynymy hõre wese, kaiboho, aõna aõna

wiwihikỹ biwinybenyke Deuxu dee. Kiakeki tahe Deuxu dealàna sōwemy ritakre. ⁹ Iwese Waha waluure wese jiarỹ aluurenyre waluuna-ribi boibenyōke. ¹⁰ Wabede ywina inyō riywinykeki, tii waluuna-ribi raōtyhy. Iwese Waha bede ywina reywinymyhỹre wese tahe Waha luuna-ribi jiarỹ tiu rahònyōhyyre. ¹¹ Wadeysana awo-ki ratxikemy jiarỹ adi watxireri. Eysana sōwemy mabekemy adi watxiwāhā. Tai tahe warybe adee rarybere. ¹² Wabede ywina heka kaa rare: –Wiluukemy. Iwese jiarỹ aluure wese wiluurenykemy. ¹³ Inyō taery dee rurukeki taluunadireki, tii luunatyhy ijōdire. ¹⁴ Kaiboho wadeewi biwinybenykewana tai inatyhymy wabiòwa toite. ¹⁵ Tahe aō wadeòdumy aōkōhe araninirenykre. Kaiboho wabiòwa toite jiarỹ dori Waha-ribi raholare adee tuu relyywāhāre. ¹⁶ Kaiboho tahe tiwatatenyōhyyte, jiarỹ tahe aratarenyre kaiboho boibenykemy. Sōwemy aōna aōna wiwihikỹ botỹỹnybenyke. Tule kia aōna aōnamy tule roihiyykemy. Tai tahe aōmy Waha-ribi wani-di bexitòenybenykeki, adee riwahinyhyy rareke. ¹⁷ Wiluubenyke: –Kia tahe wabede ywina adeereny adiwahinyde. ¹⁸ Bede ludu iny mahādu eramy reakeki myỹ uritere nohōtiōmy juhūu dori waderamy waluuōre. ¹⁹ Kai bede ludu iny tate-wana iny aluuke, tahe aōkōre. Tai tahe iny eramy reamyhỹre. Bede ludu mahādu ribi jiarỹ aratara. Bede ludu mahādu aōkō tate urenana. ²⁰ Adee heka rarybere aōmybo. Uritere iribi nohōti lusaōmy kia wahe: –Deòdu tawedu ratyire aōkō rare. Tai wadee aōbina binamy iny

rotỹỹnymyhỹre. Adeereny tule aõmy rotỹỹnykremy wahe. Tiiboho warybe riywinyrenykeki, arybe tule tiiboho riywinyrenykre. ²¹ Kia tahe adee ratỹỹnymyhỹre wanimy rybe òraru-ki, tiiboho dori wadeòdỹỹna rieryõreki. ²² Tuu ararybeõre wana inihe tiiboho òrarudiõhyyrenyre. Katahe rarybere tai tahe tiiboho rarybeõtyhy rieryõremy. ²³ Inyõ waluuõkeki, tule Waha luuõtyhy. ²⁴ Jiarỹ heka ibutuko-ò wowydyna iitxerenarenymy rewinyõrewana, tiiboho iòrarudiõhyyre inihe. Tahe rewinyamahãre, tuu robimyhỹrenyre, ihãrele tahe waluuõre tule Waha luuõre. ²⁵ Kiamy heka rotỹỹnyre bedede ywina ritidỹỹna-ki roireki. Tai heka tuu rotỹỹnymyhỹre. Kiamy wahe ritidỹỹna-ki roire:

—Tii heka bedede òraru aõkõ rare, ihãrele tahe iluuõrenyre.

²⁶ Deuxu Tyytybytyhy adee ariteònykre. Tii, wiòhedỹỹdu rarekre inatyhynamy rierynanykre. Tahe, tii kedehemynykre wamy rarybekre.

²⁷ Tule kaiboho wamy marybebenykre, wawana hyy ahãtenyteki.

16

¹ Kiamy adee rarybemahãre òraruna-txi ixekemy. ² Tiiboho heka anatakre tohodỹỹna hetowo-ribi. Kobe, bedede dỹỹnana iòhòmy kadeakreu inyõ anarubunykeki, kia Deuxudeewimy tuu konohõtinykre. Tii Deuxu wiòhedỹỹdu raremy ixi-di kònohõtinykre. ³ Tiiboho Waha rieryõhyyimyhỹrenyre tule riwaeryõmyhỹre. Tai tahe kiamy adeereny rotỹỹnymyhỹrenyre. ⁴ Iu adeereny aõmydỹỹnana kedehemynykre,

õhõtireny itxi reake timybo adeeremy relyyretxi. Tiu heka tuu rarybeõhyyre, umywanarenyhyy dori wãhãre. ⁵ Katahe arakre wadeòdÿÿdu-ò. Kaiboho bÿÿraxibenykekõ aõbo tiobo arakre-ò. ⁶ Kaiboho heka tabedewomy toite kamy rarybereriki. ⁷ Ihãrele tahe inatyhymy adeeremy ararybekre: –Adeeremy awikre arakreki wahe. Jiarÿ araõkeki awiòhedÿÿdu, Deuxu Tyytybytyhy kanaõkre. Arakeki tahe tii aditeònykre adeeremy. ⁸ Iu kanakreu, tii inydee kiditeòsinykre irayky binadiremy, iòbitina-di aõkõremy, iòrarunadiremy. Deuxu dori òrarudu riywisidÿÿnykre. ⁹ Taòraruna ixidee kiditeòsinykre tiiboho riwatyhynyòrenyriki. ¹⁰ Tahe ixidee kiditeòsinykre. Jiarÿ iratyre waòbitina direki. Waha-ò dori arakre, wamy bobibenyòtyhykemy. ¹¹ Deuxu ixiywisidÿÿna ixidee kiditeòsinykre kabede dinodu dee rarybere tii rexihukremy. ¹² Jiarÿ heka sòwemy adee ararybekemy watxireri, ibutumy tahe isiramy ixidee boholabenyke. ¹³ Txìòhe rare. Deuxu Tyytybytyhy kanakreu, inatyhymy adeeremy rarybekre inatyhyna-di ibutumy. Tarybe-di tahe rarybeòkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre. ¹⁴ Tii waaõmydÿÿnana adeeremy ritÿnynykre. Tai kidiwatoosònanykre. ¹⁵ Ibutumy Wahahõrõ heka wahõrõ rare. Tai heka tuu adeeremy rarybereri waaõmydÿÿnana adeeremy kiditynynykremy. ¹⁶ Urihimyò riòre heka waòkre, idi tahe ixityre wamy bobibenykre. ¹⁷ Tahe ijõ ierydÿÿna mahãduõ widee rarybere: –Timybo tii rarybere: –Urihimyò iòkremy tii rarybereri,

tule ixiryre wamy bobibenykremy. Tule Waha-ò arakre. Timybo heka rieryrenyõhyyre aõmybo rarybera. ¹⁸⁻¹⁹ Tiiboho Jesuisi-ò rỹraxyrenykremy ratxirenyreri. Tahe Jesuisi rierymyhỹre tuu rỹraxykre. Tahe Jesuisi tamyreny rỹraxyre: –Kaimy ixidee tỹraxytenyteri. Wananamy waòkesenalemy. ²⁰ Inatyhymy adeereny ararybekre: –Iny bede mahãdu urile reysakre, kaiboho tahe araeryrenyra urile mahinybenykre, birajuabenykre, mabedewobenykre. Idi tahe kaiboho beysabenykre. ²¹ Iwese hãwyy ijera iòhòreki, rabedewomyhỹre, taaõhõkỹmydỹnana-di rõhõtinyhỹre. Idi tahe reamyhỹre. Iu tahe tõhõti rosamyhỹre tohouã tỹmyradile reysamyhỹre. ²² Iwesele kaiboho mabedewobenykre, ixityre wamy bobebenykre tahe, kaiboho beysabenykre. Inyõ heka deysana aribireny ritaõtyhy. ²³ Kiatxu tahe uritere watỹraxydỹõmykre inatyhymy adeereny rarybereri. Waha-ribi aõmy bexitòenybenykeki. Tii adeereny kidiwahinykre wani òraru-ki. ²⁴ Tiu heka aõmy texitòenytenyõmahãte wani-di. Bexitòenybenyke, tai bitabenykre. Tai tahe kaiboho beysabenykre.

²⁵ Ibutumy rybewòtemy adeereny rarybewãhãre wahe. Idi tahe tuu adeereny ararybeõkre. Idi tahe itỹnytyhymy Waha aritỹnynykre adeereny. ²⁶ Kiatxu tahe bexitòenybenykre wani-di jiarỹ ararybeõkre umyreny Waha-ò. ²⁷ Waha dori aluurenyre, kaiboho waluurenyreki, Deuxu-ribi anade tetyhynytenyteki. ²⁸ Waha-ribi anade, bede-ò adehemynyde ihãrele bede-ribi arakremy

Waha-ò. ²⁹ Jesuisi ierydỹna mahãdu rarybere: —Wiji tahe itỹnytyhymy tarybeteri. Rybewòte-di aõkõ tarybeteri. ³⁰ Kai ibutumy teeryte. Inyõ dỹraxyõmy adee. Kai inatyhymy Deuxu-di tanate. Kia jiarỹboho retyhynyrenyre. ³¹ Tahe Jesuisi tamy rỹraxyre. Inatyhymy wijityhyle tetyhynytenyta. ³² Wabededỹnanamy heka reara. Kaibohoõ sohoji sohojimy tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watzikre, Wahawanale arỹikre. ³³ Kaheka aõna aõnamy adeereny rarybere ywina-di araykyreny-ki boibekre. Bede-ki kaiboho aõhõkỹmy botỹnybenykre. Ihãrele beysabenyke, Jiarỹ heka Deuxu òludu mahãdu-di ròtara.

17

¹ Jesuisi rarybemy rahudi tahe retehere biu-ò rarybere: —Waha, wabededỹnanamyhe reara. Ariõre watxiwãhãre. Wowydyna wadee biwahinyke tai tahe adee wowydyna adee ariwahinykre. ² Kai, Waha, ibutumy wadee ruruna tewahinyta iny deòdỹnamy. Tai umytuedeõna ariwahinykre biu-ò hedu mahãdu-ò. ³ Kia heka umytuedeõna rare: —Deuxu inatyhy tate sohojihyy tate. Tii araeryrenykeki tahe eòdỹna Jesuisi Kristu rieryrenykeki. Kia umytuedeõna rare tamyreny. ⁴ Aõ aõmysỹdỹnabo wadee tewahinyte, ibutumy adee rewinyre. Tai heka arawowydynyra kabede-ki. ⁵ Iu bede rexidelenyreu umywanahyy rarewãhã. Sõwemy loosõna nihikỹ-di rawãhãre. Tahe wiji, Waha, kia loosõnale ixityre bidiwahinykre

umywanahyymy ararekre. ⁶ Kai iny mahãduõ wadee tewahinyte bede mahãdu-ribi. Tamyreny umy rarybemahãre. Juhu tiiboho ahõrõ roire. Idi wadee tewahinyte. Tiiboho arybe riywinymyhÿre. ⁷ Ibutumy waaõmydÿÿna aribi retamahãre. Kia heka wiji tiiboho rieryrenyra ibutumy aribi nade. ⁸ Aõrybebo wadee tewahinytamy tamy rarybemahãre. Tiiboho rityhynyrenyre, rieryrenyre aribi jiarÿ anade, kai wateòdÿÿdu tate. ⁹ Iòraru-ki adee rexitòenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitòenyre. ¹⁰ Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosònanymyhÿre. ¹¹ Jiarÿ adee arakre tai kaki arareõkre. Tiiboho heka kaki rarirenykre. Tiiboho biyrubunykre, Waha, ani òbiti-di biyrubunyke, wadee tewahinyteki. Tai tahe iraykyreny wiwesehyymy roirekre. ¹² Tiiboho-wana rarewãhãu ani òraru-ki reyrubunymahãre, wadee tewahinyteki. Timy heka reõnonyõhyyre ijõ, sohojile tahe reõnonyre. Juhuu dori Ritidÿÿna roire ijõ sohojiõ ariõnonykremy. Ihyy tahe reõnonyre, Judasi Isariò õnodÿÿduhyymy rarekre. ¹³ Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralòmhyÿkemy. ¹⁴ Jiarÿ arybe tamyreny rewahinymahãre. Bede mahãdu iny dori terarenyre, tiiboho bede mahãdu iny aõkõ roireki. Iwese jiarÿ bede ludu hãbu aõkõ rare wese. ¹⁵ Bede-ribi tarasamy aõkõ heka adee rexitòenyre. Urile ibina bina widÿÿ-ribi biyrubunykemy. ¹⁶ Tiiboho tahe wiji ijõ bede

witxira ludu roire, iwese jiarỹ rare wese, wahe. ¹⁷ Arybe-di tiiboho biòbitinyke, tai ahõrõ mahādumy rarekre. Arybe dori òbitityhy rare. ¹⁸ Iwese bedede iny-ò tadiwateònyte wesemy, Jiarỹ tiiboho reteònyre bedede ludu mahādu-ò rarybekremy. ¹⁹ Tamyreny xiwena wesemy adee arexiwahinykre. Òbitihyummy ararekre, tai tiiboho òbitihyummy roirekremy inatyhyna-di. ²⁰ Aõ tamy sohojile aõkõ heka rexitòenyneri. Ibutumy kia rityhynummy rỹirakre-ò dori rexitòenyneri. ²¹ Tai tahe ibutumy wiwese wesemy rõhõtynyrenykre. Iwese, Waha, kai waki atxiteri wesemy tule aki watxireri wesemy tiiboho iny-ki roirekre. Tai bedede iny mahādu rityhynykre ateòdỹyna watxireri urenana. ²² Kai loosõna wadee tadiwahinyte, tahe tamyreny rewahinyre. Tiiboho sohojihyy weselemy roirekremy, iwese iny sohojihyy rare wesemy. ²³ Jiarỹ taireny wāhāre, kai waki ahāte. Tai tahe inyboho butuhyummy rokoirekre. Wii riòbitinymyhỹrenykre. Tai bedede mahādu rierykre tadiwateònyteki. Tule wamahādu luu tate urenana Waha, iwese waluure wese. ²⁴ Waha, titxibo ararekre, tiiboho wawanahyummy roirekre, wamahādumy wadee tewahinyteki. Tai tiiboho waloosõnamy robikre. Kai dori bedede ihokõule waluure, tahe loosõna wadee tewahinyte. ²⁵ Waha òbiti, bedede mahādu araeryõre Jesuisi tahe araeryre. Wamahādu tule rieryre tadiwateònyte. ²⁶ Jiarỹ tiiboho reerynanyre ani-di. Ihāre ta arierynanykre. Tai aluuna iwese waki ratxireri wesemy taireny rarekre, tule jiarỹ taireny ararekre.

18

¹ Jesuisi rexitòenymy rahudi tahe roirenyre taerydỹỹna mahãdu-wana Cedrõ beawe-ribi kowa ijà-ò heka reuròrenyrene, tahe bederaty oworuro-ò rirònyrenyrene. ² Judasi heka Jesuisi tyhedỹỹdu heka ibede rieryre, Jesuisi dori taerydỹỹna mahãdu-di tamy rahyymyhỹre. ³ Tahe Judasi, soldado mahãduõ tadinodu-wana ributunyrene. Fariseu mahãdu-ribi xiwena wedu wahidỹỹdu-ribi Judasi soldado yrubudỹỹdu mahãdu rihitxinyrene tule xiwena deòdu mahãduõ rihitxinyrene tii-wana rakremy roirenyrene. Tahe tamy ritehemynyrenyrene tòbòra heòty-wana. ⁴ Jesuisi rexieryrene ibutumy aõmybo tamy kodotỹỹnykre. Tahe iny mahãdu-ò rexidorunyrene. Tahe rỹỹraxire tamy: —Mowe teijetenyteri. ⁵ Tahe dirawyònyde: —Jesuisi Nazare hãwã ludu reijereri. Tahe Jesuisi rarybere: —Jiarỹ wa tiile rare. Tahe Judasi ityhedỹỹdu tii mahãdu wanale nade. ⁶ Jesuisi tamyreny rarybereu, tahe rexilòhòrarienyrene iribi, tahe suòle reserenyrene. ⁷ Ixityre Jesuisi tamy rỹỹraxire: —Mowe teijeteri. ⁸ —Jesuisi Nazare hãwã ludu, tiiboho dirawyònyde. —Rarybera tahe jiarỹ raremy wahe. Tiwajeteri-wana tahe biwadyke urile ixinamy waijoi rirahuke. ⁹ Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu rotỹỹnykremy. ¹⁰ Tahe Pedro tamaydese ritamy reare tahe xiwena wedu deòdu riwotõmonyrene. Malòò heka inire. Pedro Malòò nohõti riorore ruruwe-ribi ludu wahe. ¹¹ Jesuisi rarybere Pedro-ò: —Amaydese birutyke. Jiarỹ Waha

deewimy aõhebo arotỹỹnykrekõ aõbo wadi tahõtinyteri. Aõhõkỹmy arotỹỹnyõkemy aõbo wadi tahõtinyteri.

¹² Tahe soldadu, tadinodu-wana, judeu yrubudỹỹdu-wana Jesuisi rimyre ritaataamy ridyre. ¹³ Kia beõra Kaifa xiwena wedu tyhy rare. Anasi iriõre labie rare. Tai tahe juhUU Ana-ò ridyre. ¹⁴ Kaifa tahe juhUU judeu mahãdu-ò rarybere: –Wiji beõramy hãbuõ iny mahãdu òraru-ki rurukremy rahõtinyreri.

¹⁵ Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore òtity ijòrore-di. ¹⁶ Pedro tahe ahanakile rỹire. Kia Pedro-wana rare. Rohonyre hetowo-ribi hetoijò-di itxeredu-ò rarybere, tahe Pedro ridyre hetowo-ò. ¹⁷ Kia ijadõma, heto ijò-di itxeredu rarybere Pedro-ò: –Kai Jesuisi erydỹkỹna mahãdunokõ anobo tate. Tahe Pedro dirawyònyde: –Aõkõre. ¹⁸ Tahe soldado yrubudỹỹdu tai rahetõmy rỹimyhỹ, heto ludu deõdu mahãdu-wana txutàtà riki. Pedro iyrenyikile rỹimyhỹ rahetõmy.

¹⁹ Tahe xiwena wedu tahe Jesuisi-ò rỹỹraxire. Aõhebohe aerydỹỹna mahãdu-wana tadotỹỹnymahãte. Timybohe tebedeerynymahãte. ²⁰ Tahe Jesuisi ritỹnynyre: –Ibutumy inyko relymahãre iwasimy aõkõ heka relymahãre. Judeu dohodỹỹna hetokile relymahãre Deuxu dohodỹỹna heto-wana. Titxibo judeu mahãdu ributunymyhỹremy relyywãhãre. ²¹ Tai aõherekibo wadeele tỹỹraxiteri. Myỹraxike wadee ijohonadu-ò. Tiiboho ka rieryrenyre aõmybo rarybere. ²² Jesuisi

kia rarybereu, soldadu itxereduõ rihetenyre. Tahe rarybere: —Tu heka rybeõmyke xiwena wedutyhy-ò. ²³ Jesuisi dirawyõnyde: —Jiarỹ ibinamy aõmybo rarybera-wana, manarybeke tuu. Aõkõkeki, awimy rarybera-wana aõherekibo tiwahetenyte. ²⁴ Anasi tahe Jesuisi ridykemy riteõnyre tataanadihyyle Kaifa-ò, xiwena wedutyhy wahe.

²⁵ Kowa tahe Simaõ Pedro ratximyhỹre rahetõmy rỹimyhỹ. Inyõ rỹỹraxire: —Kai aõbo ierydỹña mahãduõ tate. Tahe rexitxiõnyre. Jiarỹ ijõ aõkõ rare. ²⁶ Xiwena wedu deõduõ Pedro-ò rỹỹraxire: —Tii heka Pedro ritõhõtiorore ijoiõ rare. Tahe tamy rarybere: —Umy taheka rabire tii-wana bederaty oworuro-ki atximahã-ò. ²⁷ Pedro ixityre rexitxiõnyre. Aõwesele tahe hãnie hãbu robure.

²⁸ Idi tahe Kaifa heto-ribi Jesuisi ridyrenyre ywisidỹña-ò bede dinodu heto-ò rudiulere. Tii-boho rirõnyõhyre brebuna-di rexisunyunyheny. Rirõnyrenykeki, tahe Pascoa worana bedehesi rỹsỹnaõ rirỹsỹõtyhy. Tiiboho dori rõhõtinyre rirõnykeki, brebuna raremy. ²⁹ Tahe Pilato rònõnyre tamy rarybekremy: —Tahe Jesusimy tamy rỹỹraxire kia hãbumy terajuatenyteri aõhebohe rotỹỹnyra. ³⁰ Tahe dirawyõnyde: —Aõbibina binamy rotỹỹnykõhyra wana inihe aridyrenyõhyreri. ³¹ Tahe Pilato rirawyõnyre: —Bidyke abede ywina rybe-di biywinyke. Tahe judeu mahãdu rarybere: —Wabede ywina rybe warubudỹỹmy rybe aõkõ rare. Inyõ heka arirubunyunyõtyhy. ³² Kia rybe tahe Jesuisi rybe wesemy rare. Tii dori iximy rarybere timybo

rurukremy. Tai timybo irybe hitxina wesemy raryberemy ibutumy rarekre.

³³ Ixityre Pilato ralore ywisidỹỹna-ò Jesuisi-ò rỹỹraxire: —Kai aõbo judeu mahãdu Iòlò tate.

³⁴ Jesuisi ritỹỹraxinyre: —Yřaxina aõbo ahõrõ rare ada ijõ aõbo wamy kia rarybere. ³⁵ Tahe Pilato rarybere: —Jiarỹ wa judeu mahãdu aõkõ wãhãre. Aõbinatyhymy aõbo he tewinyte. Judeu mahãdu wadee tiwadyte. ³⁶ Jesuisi dirawyònyde: —Waiòlòna hãwã bedede ludu aõkõ rare. Waiòlòna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watxiwãhãre. Tahe aõkõre kabede ludu aõkõ Waiòlòna rare. ³⁷ Pilato tahe rarybere: —Kai aõbo inatyhy iòlòmý tate. Tahe Jesuisi dirawyònyde: —Kai ka wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamýhỹre. ³⁸ Tahe Pilato rỹỹraxire: —Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kỹny kahãbu-ki aõ ibinamy tai rahaõhyra. ³⁹ Inyõ ariteònykemy watxireri kaiboho wadi tõhõtinyhytyterteri ka woranabedehesi-ki. Tahe judeu Iòlò aõbohe ka ribi ariteònykre ywi-hyyle. ⁴⁰ Tahe ixityre ibutumy rryryrenyde: —Kia hãbu aõkõre, Baraba biteònyke (Baraba heka hãbu debore wasidu rare.)

19

¹ Idi tahe Pilato Jesuisimý rerotiyhyta-di raòhòtekremy soldado mahãdu riteranyre.

² Soldado mahãdu edehekỹ rataanadile ira-ò ritidire, iumy tahe tylỹrehekỹ-di rityynyre

iòlòtyywesekemy. ³ Tamy rehemynymyhÿre: — Aõherebo iòlòtyhy wesena, tahe rihetenyrenyre. ⁴ Pilato tahe ixityre ròhònymy iny-ò rarybekemy: —Ixityresÿ adeereny redyreri. Bierybenyke. Aõ heka tai ibinaõhyymy idi retehewãhãre. ⁵ Tahe Jesuisi ròhònnyre ede rataana-di tylÿrehekÿ-di. Tahe Pilato tamy rarybere: —Kakÿnyhe tiire. ⁶ Tahe xiwena wedu mahãdu, yrubudÿÿdu mahãdu tuu robireu, ryryrenyre birubunybenyke, itxeò dee bitamadÿÿnyke. Pilato rarybere: —Kaibohole itxeò-di bitamadÿÿnybenyke. Jiarÿ tahe tai ibinamy aõki rahaõhyymahãre. ⁷ Tahe judeu mahãdu rarybere: —Jiarÿboho kÿny wabede ywina renydire. Rurukemy heka tuu bede ywina roireri, tii dori Deuxu Riðremy rexininimyhÿre. ⁸ Pilato kia-ò roholareu tahe, ruberutyhyre. ⁹ Ixityre ralore ywysidÿÿna heto-ò: —Rarybere Jesuisi-ò, tiribi wexe tanate. Jesuisi rirawyònyõhyyre. ¹⁰ Tahe Pilato rarybere: —Bidiwarawyònyõkre aõbo. Jiarÿ warurudire anarubunyke aõbo ada arateònyke aõbo. ¹¹ Jesuisi rirawyònyre: — Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidÿÿdu aratyre iðraru dire. ¹² Tai tahe Pilato iteòdÿÿmy rurure. Tahe judeu mahãdu tamy ryryre: —Kai biteònykeki tahe, Iòlò Cesar biòwa aõkõ tate. ¹³ Kiarybe-ò Pilato roholareu tahe, Jesuisi diòlòdÿÿnyde ahana-ò. Pilato tahe ywisidÿÿna ryna-ò rexisÿnyre. Kia ubeni heka Rirana Ijàti inire. Tahe judeu rybe-ki heka Kabata inire. ¹⁴ Pascoa worana bedehesitxu sexta feira rÿire. Txutye iòhòmy

tahe bede rỹire. Tahe Pilato rarybere judeu mahãdu-ò: —Betehebenyke aiòlòreny-ò. ¹⁵ Tahe tiiboho rryryrenyre. Bidybenyke! Itxeònihikỹ-ò birubunybenyke. Pilato tahe tamy rarybere: —Aiòlò aõbo, birubunybeny. Tahe xiwena wedu rirawyònyre: —Iny iòlòreny sohojile wa rare: —Cesar heka inire. ¹⁶ Tahe Pilato Jesuisi tamyreny riwahinyre rirubunyrenykemy.

¹⁷ Tiiboho heka Jesuisi ridyrenyre. Iitxeò tamy riwahinyre idi retyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki. ¹⁸ Tai itxeò nihikỹ dee ritamadỹỹnyre ijõ hãbu inatxiõ-wana Jesuisi itxeònihikỹ itya-ki rỹire. Hãbu wiò wiòmý idi rỹire. ¹⁹ Pilato riritinyre ritidỹỹna-ò Jesuisi tyre-ò ritidire. Kawesemy ritidỹỹna roire: —JESUISI, NAZARE HÃWÃ LUDU, JUDEU MAHÃDU IÒLÒ. ²⁰ Hãwã-ribi ireheriòremy roire. Tai tahe sówemy judeu mahãdu tuu robire iritidỹỹnamy. Inataõ rybemy witxira riti heka inataõmy roire. Judeu rybe ijõre, latim rybe ijõre, grego rybe ijõre. ²¹ Judeu xiwena wedu mahãdu Pilato-ò rarybere: —Judeu mahãdu Iòlò rarybere: —Iritidỹỹõmyke wa. Kawesemy biritinyke: —Tii rarybere judeu mahãdu Iòlò raremy. ²² Tahe Pilato dirawyònyde: —Iwese reritinyre wesemy rarehykre.

²³ Soldado Jesuisi itxeònihikỹ-ò ritamadỹỹnymy rahudi tahe, ityy ritxuatxuakremy diwyde. In-aubiòwa heka riywinyra. Wirarea riwykremy soldado mahãdu idi rỹireri. Iyhyitxena tahe iretydyna-di aõkõ rare. ²⁴ Tahe ijõ widee rarybere: —Iyreyredỹỹrenyõmyke wa urile ta idi riki-

hurenykre mobo ritakremy. Kia ryberiti-ki tuhyy roire:

—Watyy ritxuatxware ijõ yre wimy riywinyrenyre. Tule wayhyitxena tyre-ki rehurenre mobo ritakremy. Tahe iwese Tyyriti rarybere wese, soldadu mahãdu ibutumy aõhebo risỹnyre.

²⁵ Inaubiõwa hãwyy retehemy rỹimyhỹ Jesuisi itxeõnihikỹ iõhõmy. Jesuisise taseriõre-wana, Marie Madalena ijõre, Klopa hãwyy ijõre. ²⁶ Jesuisi tadimy robireu, Joaõ, taerydỹỹna luunadu bire-ki, tahe rarybere: —Nadi beteheke wa kowa ariõre rare. ²⁷ Tahe Joaõ-ò rarybere: —Kaa adi rare. Ierydỹỹna Joaõ tahe ridyre taheto-ò tai rasỹnykemy.

²⁸ Jesuisi tahe rieryre ibutumy rexihuramy tahe rarybere: —Ariõkemy watzireri. Kaimy heka rarybere aõbo Ritidỹỹna-ki roire riwinykemy. ²⁹ Tai tahe vỹi mona silỹnyhỹkỹ-ki raharenyre. Tahe Jesuisi-ò iwereheni wese-ò rituunymy idi riteõnyre iry-ò teòdimy. ³⁰ Jesuisi tuu riõre idi tahe rarybere: —Ibutumy Waha aõmysỹdỹỹna rexihumy roire. Tahe ròtiòròmý resere iule ta rurure.

³¹ Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeõ-ki ririkõkemy tuu rarybemyhỹre. Tai Pilato-ò judeu mahãdu rexitõenyre hãbuti riòròmý riteõnykemy, itxeõ-ribi ritakemy. ³² Tahe soldado mahãdu hãbuti wiõle riorore. ³³ Jesuisi tahe rury roireki iti riòrõõre. ³⁴ Soldadoõ tahe Jesuisi-ki rojyre iweki tahe hãlubule rohonyre bewana. ³⁵ Kia tuu rabire tahe õbitimy tuu jiarỹ rarybere, Joaõ wahe. Waritidỹỹna inatyhy raremy, reeryre.

Kaiboho bityhynybenykemy, adireny watzireri.
³⁶ Kaheka ibutumy iritina hetxina tuu rarybere heka ibutumy tuu rotỹỹre. Kia wesemy roire: — Iti riòròòkre, sohoji aõkõ. ³⁷ Ijõ iritinaõ kawesemy roire:

—Rirorenykre tõnori-di idi reteherenykre tamy.

³⁸ Jyje heka Arimatea hãwã luduõ rare. Idi tahe tii Pilato-ò rexitòenyre Jesuisi umymy rituunykremy. Tii heka Jesuisi heluduõ rare. Judeu mahãdu lau ruberumyhỹ tai Pilato-ò rare wasimy. ³⁹ Pilato tahe awiremy rarybere. Tahe Jesuisi umy riwyre. Nikodema tule rare Jyje-wana. Tii juhule rummy Jesuisi-wana widee raryberele rare. Tii òwòrutyby òwòruòbru-wana aderòna wesemy diwyde sòwemy, ⁴⁰ 45 urihixinamy riutxienanyre. ⁴⁰ Tahe Jesuisi umy tyky jurarehe-wana ritỹtenyre aderòna wanahyyle. Kawesemy dori judeu mahãdu iny rituunymyhỹre. ⁴¹ Itxeòalamana-ribi bederaty oworu iòhòmy roire. Ityi-ki tahe wabede tamyra roire. Mana hãloo rỹire tai heka moo rawabedenyõhyyre. ⁴² Tai tahe rawabedenyre iòhòreki, tule judeu worana bedehesina txumy roireki.

20

¹ Semana juhu ludu txu Marie Madalena rehemynyre wabede-ò, rudile wahe. Mana ijòtòbòna iraylemy rỹiremy idi retehere. ² Tahe raijaranyre Simaõ Pedro-ò, ijõ Jesuisi luunaduõ wahe, Joaõ-ò, jiarỹle wahe. Tahe wadeereny rarybere: — Wahĩ tahe hãlokowoku-ribi ritakarenyra. Titxibo ritidira, rekerykõre. ³ Pedro tahe ròhònyre, Joaõ-wana wabede-ò roire. ⁴ Wiwana raijaranyre

tahe jiarỹ Pedro ratyre raijaranyre tamy. Jiarỹle heka juhu tamy rehemynyre. ⁵ Tahe rawebesere iwo-ò itxeremy. Irahanalemy rabire. Ta ralòõhyyre tamy. ⁶ Idi Pedro rehemynyre ralore tamy. Tule irahanamy robire. ⁷ Jesuisi rati rasirahana rihitxinymy roire ixivanale. ⁸ Tahe jiarỹ juhu rehemynyre tahe Pedro hewomy ralore. Tuu robire, retyhynyre. ⁹ Tiiboho dori ritina rieryrenyre ihãre tahe rierytyhykõlerenyre. Jesuisi rubu-ribi rexiixixanykemy ritina roire. Tii tahe rierytyhykõlerenyre. Tahe wiji rieryrenyra. ¹⁰ Tahe ixiby raòkeserenyre inyhetoreny-ò.

¹¹⁻¹² Marie tahe robumy wabede-ribi iòhòmý rỹire. Rawebesere tahe wabedewo-ò itxeremy. Inatxi ýjummy robire iwo-ki itykyuramy roimyhỹ. Ijõ heka rỹmy rononymhỹ Jesuisi ratiherina tyre-ki. Ijõ tahe iwaherina-ki rononymhỹ. Jesuisi umy tahe iõre. ¹³ Tahe ýju Marie-ò rỹýraxire: —Hãwyy, aõherekibo tabureri. Rirawyònyre: —Wahĩ kumy dokuri riwymy ramyhỹre. Rekerykõre titxibo ritidira. ¹⁴ Iu rarybereu tahe tahewoòle roosere. Jesuisimy robire rỹimyhỹò. Tii heka rieryõhyymyhỹ tii Jesuisi raremy. ¹⁵ Tahe Jesuisi rỹýraxire: —Hãwyy aõmybo tabuteri, mobo teijeteri. Bederaty oworu ywidỹýdu raremy heka tii rõhõtinyre: —Tahe dirawyònyde: —Wahĩ, kai anobo karibi tetakata-wana wakoku tuu belykyke. Tahe jikarỹ karikorykremy. ¹⁶ Tahe Jesuisi tamy ryryre: —Marie! Marie rokesemy reare riijemy: —Wahĩ, erydỹkỹdu! (Tii hebraika rybe tuu rarybere: —Raboni, wahe.) ¹⁷ Jesuisi rarybere tamy: —Waroorehedỹýõmyke wa. Waha-ò dori raõlemy

wãhãre tahe arakre. Kai tyhydÿÿdu seriõre-ò makre tamy rybemy. Jesuisi rarybere kawesemy: —Arakre inytybyreny-ò, iny Deuxureny-ò. ¹⁸ Idi tahe rarybere erydÿÿna mahãdu-ò Wanyrÿmy rabora. Marie Madalena relyyre timybo raryberamy.

¹⁹ Semana juhu ludu txuu, txioromy heka Jesuisi erydÿÿna mahãdu wii ributunymy rÿimyhÿ hetowoõ-ki. Ibutumy ijò ritòbòtòbònnyra judeu mahãdu lau brebumy. Jesuisi tahe nade iyreny-ò rexitÿnyre. Rarybere: —Ywina araykywo-ki atxikemy idi watzireri. ²⁰ Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenre Jesusimy robireki wahe. ²¹ Ixyby tamy Jesuisi rarybere: —Ywina araykywo-ki rarekemy idi watzireri. Iwese Waha diwateònyde wese tule arateònykre. ²² Iu tahe ribunymy rarybere: —Deuxu Tyytybytyhy teta-teri. ²³ Inyòrarunaõ biixãwididÿÿnykeki tule kia òraruna ariixãwidinyke. Tule aòkòkeki, ijò òraruna biixãwididÿÿnyòkeki, kia tule ariixãwididÿÿnyòke.

²⁴ Tome (Inatxina iniõre) tii waòinatxi reurò mahãduõ rare, tahe tairenyõre heka Jesuisi nadeu. ²⁵ Jesuisi erydÿÿnaõ rarybere: —Wanyrÿmy raborenyra. Tahe Tome tamyreny rarybere: —Retyhynyõre kÿnyhe.

²⁶ Semana sohoji bededÿÿnanamy idi rÿire, ixyby wii ributunyre Jesuisi erydÿÿna mahãdu. Iu tahe Tome tii mahãdu-wana ratximyhÿ. Ijò ritòbòtòbònnyrÿimyhÿ. Tahe Jesuisi nade iyreny-ò. Tamyreny rarybere: —Ywina-di araykywo-ki atxikemy idi watzireri. ²⁷ Tahe Jesuisi Tome-ò rarybere: —Betehe inihe

wadebòrurena-ò ebò inihe tamy bidadidike. Tule wawerurena-ò ebò bidadidikre. Itxiõdỹỹõmyke wa, bityhynyke. ²⁸ Tome tai dirawyònyde: —Wanyrỹ, waDeuxu. ²⁹ Tahe Jesuisi rarybere: —Tome, kai aõbo biwatyhynykre wamy tabiterikile. Sõwemy deysana inyõ kanakemy wãhãre tiiboho dori wamy robiõre hãrele riwatyhynyrenyre.

³⁰ Jesuisi heka sõwemy aõwiwihikỹbo riwinyre. Ierydỹỹna mahãdu heka kia aõmybo robire. Kia aõmydỹỹnana heka ihoõre kaki iritina-ki. ³¹ Kaa ritidỹỹna reritinyre Jesuisi Kristumy rare. Deuxu deòdỹỹna rare. Kia bityhynybenykemy wahe, Deuxu Riõre wahe tetyhynyteri-wana tahe umytuedeõna bitakre, ini òraru-ki wahe.

21

¹ Iribi tahe Jesuisi rexitỹnynyre Tiberiade ahohokỹ ijà-ki. Kia wesemyre heka. ² Ibutumy heka juhu rỹimyhyỹ: —Simaõ Pedro, Tome Didimo iniõre, Natanaeli. Tii Kana hãwã ludu rare, Kalileia bedeki. Zebedeu riõreboho ijõre, inatxi Jesuisi ierydỹỹnaõ ijõre. Rarekie. ³ Tahe Simaõ Pedro rarybere tamyreny: —Rià teredỹỹmy arakre. Imahãdu rarybere: —Jiarỹboho aroirenykre ahemy. Tahe roirenyre hãwò-di. Aõhomy aõkõ ruu idireny nade. ⁴ Tahe bedeki ratỹnyrau heki Jesuisi ãnyrakile ratximyhyỹ. Ierydỹỹna mahãdu tahe rieryõhyymyhyỹre. ⁵ Jesuisi ryryre tamyreny rỹỹraxire: —Ijoi moõ rokoreny. Utura aõbo temytenyta? Rirawyònyre: —Aõkõre wa. ⁶ Kaiboho biterebenyke rurunawe-ribi taita bimybennykre. Tahe riterenyre sõwemy rautxienyre iriã heka ritusinyõhyymyhyỹrenyre

utura sōwerekī. ⁷ Kia ierydỹñaõ Jesuisi luunaduõ rare jiarỹ, Joaõ wahe. Jiarỹ tahe Pedro-ò rarybere: —Inynyrỹle wa rare. Pedro Jesuisi raramy roholareu, tatyky tawetyamy ritaamy tamy resere, tade hekỹlemy rareki. Tahe resere bera-txi tamy rakremy. ⁸ Ijoi mahãdu rià-di narurunymy nade utura sōwerekī. Tahe 100 urihixinamy ãnyra-ribi ratximyhỹreny. ⁹ ãnyra-ò rejuxunyreu tahe, robirenyre heòtymy obiurawo-ki. Orotxu tule tai rỹire. ¹⁰ Jesuisi tamy rarybere: —Uturaõ bidiwybedenyke wiji temytenytaõ. Simaõ Pedro hãworibile rià-di rarurunyre. Sōwemy heka tai utura nihikỹ rỹimyhỹ, 153 wahe. Ihãre tahe rià raòròðhyre. ¹¹ Tahe Jesuisi rarybere: —Manake hewa biroxibenyke. ¹² Ibutumy ierydỹña mahãdu rieryre tii inynyrỹreny raremy. Tai tahe inyõ rỹraxyiðhyre: —Mobo tii raremy. ¹³ Tahe Jesuisi orotxu rimyre. Tamy riwahinyre. Ixiyrubule utura tamy riwahinyre. ¹⁴ Kia tahe ihewotyhymy Jesuisi rexideòsinyre taerydỹña mahãdu-ò, rubu-ribi dexixade hewomy wahe.

¹⁵ Riroximy rahudi tahe Jesuisi Pedro-ò rỹraxyre: —Simaõ, Joaõ riòre, kahãbu mahãdu waluure. Kai tahe iratyre aõbo waluure. Tii rirawyònyre: —Kai tiwaeryte, aluure. Tahe Jesuisi rarybere: —Wabudoeni riòre bidiòwenyke. ¹⁶ Ixityre rỹraxyre: —Simaõ, Joaõ riòre, kai aõbo waluure. Tahe Pedro rirawyònyre: —Kohe, Wanyrỹ aluure jiarỹ, tiwaeryta. Tahe Jesuisi rarybere: —Bidyke wabudoeni biòwenykemy. ¹⁷ Ihewotyhymy tahe Jesuisi rỹraxyre: —Simaõ, Joaõ riòre, kai aõbo waluure. Iu tahe Pedro

rabedewomy ronyre, ixityremy rỹřraxireki. Tahe dirawyònyde: –Wanyrỹ, ibutumy teeryte aõna aõna. Aluure heka, tiwaeryta. Tahe Jesuisi rarybere: Wabudoeni biòwenyke. ¹⁸ Inatyhymy adee ararybekre. Iu ijoi morõkõmy tatemahãu, ixivanale texityynmahãte ixidee wimy titxibo tamahãte. Iu tahe mamatuarinykre inywitzira aratyynykre, Ebò biteòsinykre iny arataaanykre tahe inyõ aradykre titxibo noderamy beakreò. ¹⁹ Kiamy heka Jesuisi rarybere ritỹnynykremy timybo Pedro rubu-ò rỹikremy. Tai Deuxu riwowydynykre. Idi tahe Jesuisi rarybere: – Biwaheludunyke wa. ²⁰ Tahe Pedro retehere Joaõ Jesuisi hemy rareriò, Joaõ Jesuisi luumy raremyhỹ. Joaõ ihetxiu Jesuisi-ò iòhòmy rỹřraxire jiarỹ wahe: –Mobo iwahisidỹřdukremy, ihewo ludu roxina rỹireu. ²¹ Tahe Pedro Joaõmy robireu, rỹřraxire Jesuisi-ò Joaõmy. Aõbo he tamy rotỹỹnykre. ²² Tahe Jesuisi rirawyònyre: –Tii rurukõlemy adòòsekemy idi watzikeki, timybo tahõtinyte. Adee tahe biwaheludunykekile awike. ²³ Ierydỹřna mahãdu rarybemy raremyhỹ: – Kiamy wahe Joaõ rurukõlemy Jesuisi rarybere. Tahe kiamy aõkõ Jesuisi rarybere. Jesuisi juhoo rarybere: –Tii rurukõle adooskre-wana, timybo tahõtinytenyteri.

²⁴ Jiarỹ tahe kia aõmydỹřnanamy relymahãre, Joaõ wahe, reritinyahãre. Inatyhymy kia tuu rare, jiarỹ tuu relymahãre.

²⁵ Sõwemy aõmydỹřnanamy tahe Jesuisi riwinyre. Inyõ ibutumy riritinykeki, iritina heka bedo ritỹxinykre tyyriti sõwekre-wana.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files
dated 29 Jan 2022

55ce0bcd-101e-52a3-984e-847027efe150